

萬 有 文 庫

第 二 集 七 百 種

王 雲 五 主 編

樊 榭 山 房 集

(四)

厲 鶚 撰

商 務 印 書 館 發 行

樊榭山房集

(四)

稿 牘 撰 集

國學基本叢書

樊榭山房續集卷第六

詩已

西湖競渡曲四首

熟梅過後水如天。疊鼓初聞破曉烟。三載王郎棚下夢。何如閑上汎湖船。予年來午日皆客廣陵故用王播事。

竹風葵日共鮮新。向午湖亭扇障塵。試爲樓家參轉語。八分烟水二分人。

二分烟水八分人。樓攻媿西湖競渡句也。

簾影參差幾舸開。傍湖亦有小樓臺。綠窗翦舌教鸚鵡。催看龍舟獨後來。

瓶花齋賦盆中小松用少陵四松韻

松於衆木中。爲性最堅強。託根在盆盎。鬱屈固不長。雖無鶴來巢。幸免蟻見傷。想以醜怪姿。丘壑難掩藏。移青自遠舸。分影臨清防。我聞天子都。名蹟游軒黃。餐脂斲虎魄。服粉祝桃康。森然未盈尺。來登君子堂。赤日絕天地。微蔭寧爲涼。兒童遭褻視。豈知閱冰霜。今晨暑雨駛。彷彿龍鱗張。拏雲莫便去。奮迅天渺茫。何如供嘯傲。坐使永晝忘。其下置拳石。古色同蒼蒼。

李迪秋原放牧圖爲旭瞻作

角觶。耳溼溼。考牧詩中全物色。天蒼蒼。野茫茫。敕勒歌裏西風涼。西風老樹莽蕭瑟。認得三朝畫師筆。
平顯題李迪畫詩。歷事三朝老畫師。縱橫直是谷量餘。蹢躅疑從畦種出。曠坡蔽隴下層阿。夕陽滿地沙草多。一人韋裳轉首坐。天晴堆積笠與蓑。從來畜獸圖非易。寧著青紅掃魑魅。今觀此卷態逼真。令我他年勞夢寐。汪生讀書古人齊。兼金購此索我題。不如長五牴。留二瓶。君看富如猗頓貴。卜式無過西河河南兩牧兒。

入秋酷暑。七月十二日晚。風月甚清。遂有涼意。

新涼有情助獨吟。螢影熠熠照堂陰。秋聲滿簾那可覓。明月出樹如相尋。今我不樂歲云暮。古人已往誰嗣音。扁舟後夜汎湖去。驚起老鶴橫西林。

中元夜。同舒雲亭明府。竹田甌亭諸君汎湖。

遊雲吹盡一輪孤。碧漲光連裏外湖。買得迎涼新舫子。來看臥水玉浮圖。柳邊夜笛清逾迴。山際秋燈淡欲無。共惜前汀好風露。坡仙逝矣不堪呼。

八月十八日同敬身觀潮

西風吹客出重城。乘興聊爲江上行。買酒旗亭望山遠。焚香野廡拜潮生。喧呼兒女秋誇雪。浩蕩龜魚晚弄晴。欲學盧郎無賦筆。老夫胸次尙崢嶸。

沈侍御椒園於任城南池。翺建杜少陵祠。徵詩紀事。

少陵游處剩空池。傑構任城始有祠。粟主應從許簿祀。酒樓合配沈光碑。繡衣風雅千年續。飯顆忠貞異代師。待我重來訪陳迹。蒲荒菱熟薦深卮。

病中以滿城風雨近重陽爲首句得詩三首

滿城風雨近重陽。病減情懷老減狂。足輓杖藜渾得力。耳鳴鞞鐸果何祥。僮奴決意辭貧主。醫匠收功試古方。我已是非俱不問。笑看梧葉墜虛廊。

滿城風雨近重陽。唧唧陰蟲夜漸長。瘦比隱侯猶較倍。愁應平子爲分將。青燈難遣詩魔嬈。丹鼎翻嫌琴客妨。領取秋深閑意味。不眠常是望晨光。

滿城風雨近重陽。及至重陽霧色蒼。問疾客來時一二。登高人想不尋常。時朱丈鹿田招集吳山登高不克赴琉璃水淺盛新月。瑤瑤天空映拒霜。梁簡文詩。瑤瑤映霜天。誰道秋容麗如許。閉門也有小篇章。

次韻答平湖舒明府見寄

藉甚舒明府。相逢恨最遲。因吟湖寺句。不減武功詩。俗重持螯日。官閑穫稻時。自憐多病客。搖蕩覓前期。

寄樊榭徵君

滿州舒 瞻雲亭

期。衆中一握手。翻媿識君遲。夜月重湖棹。秋燈古寺詩。官身牽別夢。樂事負佳時。九日登高約。黃花恐後

謝甌亭送藥資

叩戶聲何急。兼金餉病夫。寧憂宋清券。恰稱杜陵須。衰賤君何取。殷勤俗更殊。朝來知有喜。敲枕聽風爐。

晚秋懷攝山舊游

秋氣澹如此。孤雲迴未還。病餘留幻質。心遠屬名山。古殿松聲冷。中峯月影閑。舊題崑上字。應是有苔斑。

小雪日偶成

苒苒流年小雪催。翻書過日興悠哉。無兒北宇猶栽竹。有句南簷欲問梅。卷葉風多流水斷。護霜雲薄夕陽開。病餘自喜嘗新穀。鼓腹清時又一回。

題吳志行從軍圖

故寫軍裝作遠游。比於客帳夢封侯。書生有分垂青史。烈士何當歎白頭。草檄手閑秋巷冷。浙矛語險暮雲愁。不如共我跣趺坐。千古貂蟬付一漚。

雨

經秋成久涸。液雨亦知時。稍破萍黏塊。微通葉擁池。寒烟飛不去。暮雀宿難遲。竟日支頤坐。何妨類白癡。

炭壘二十二韻

人生百寒暑。奉養逐時變。勞勞營裘葛。佐以爐與扇。扇虛本來風。爐必熾炭便。高門無嚴辰。滿室麒麟炫。

銷焯不足惜。下里詎能徧。厥製惟鑿良。九九徵宋諺。宋夏至後諺云九九八十一家。家打炭鑿出陸泳吳下田家志。屑之復羅之。和泉若

澗麪。金椎脫其模。砥石平湓澱。南榮曝使枯。坐待風雪戰。一枚真深灰。杵火乃自銜。初疑釜星隕。漸比陽

烏見。鞞塚竟日除。溫磨終夜戀。石墨儷京華。木樨笑僧院。命名瓴未燒。許氏說非衍。說曰鑿。砥適也。燕髡一曰未燒者。

釋云坯。與此同一傳。遂僧行均龍龜手。鑿云鑿。塼坯也。又聞洪景伯嗜古有餘羨。永初作官鑿。字出武陽縣。宋洪适得眉州漢武陽故

城鑿字云永初七年作官鑿。土炭類則齊。擊土技斯擅。烘燎等儲侍。取義無可揀。禦冬鄙事耳。瑣細安貧賤。那愁邾穿

墮。漫學羊綉。齏閉戶起病餘。觸物弄筆硯。

杭葦浦招集寄巢戲賦冬閨用魚元機和光威哀聯句韻銷寒第一會

深沈子夜深沈院。月底飛來青鳥三。拂拭紅絳開曉鏡。商量白紵製春衫。無題慣入冬郎詠。有信偏宜喜

字銜。夙習偶呼長命女。今生堪伴善思男。維摩居士男名善思。斜河欲轉應斜眄。小市初迎合小慙。釀雪年光歸緩

緩。翦燈心緒話喃喃。吳潮解送明於練。楚岫相望蠹似簪。願作羅幃君是覆。若爲香瓣妾能含。佳期箏柱

參差定。真誥琴弦子細譜。舊姓曾憐碧玉嫁。蕃釐記向綠衣參。流連臘酌鉤藏醉。取次花錫竈祀甘。何事

畏寒多晏起。殘陽容易到梅南。

鄭筠谷太史挽詩二首

引疾遄歸僅數年。頓成一枕小游仙。故人共惜風流盡。造物偏慳水石緣。新史同修長最擅。遺經獨抱子

能傳從今玉樹深埋後。應有精靈在簡編。

平生笑語樂通懷。亦抱迂疎與俗乖。自重德輿經絨冕。竟乘神馬外形骸。記尋梅下三衣客。辛酉春借筠訪太虛上人于花塲。忍過城東十字街。十字街見古樂府。酒伴寂寥吟社冷。但餘帶草繞空齋。

汪秀峯自松江載書歸招同人小集分韻銷寒第

雪壓扁舟浪有棱。載來書重恐難勝。排聯清興惟同鶴。增長多聞似得朋。歸洛舊傳東野句。孟郊有喜盧入杭新並蓼塘稱。元上海莊蓼塘藏書七萬卷。銜杯不獨相忻賞。欲賃鄰居翦燭燈。

十二月八日敦復招集餅花齋食臘八粥聯句銷寒第

歲序何嶸嶸。周京穆門星紀忽已弔。八葉抽堯莫。金志章江聲五德重漢臘。吟社邀襟聯。樊榭山館喜簪盍。浴佛東京

遺。梁啓心設林設供西竺法。漑釜精作糜。丁敬龍泓析薪燎以蠟。果兼檜殼膚。杭世駿蘆浦米槩升侖合。釋之復揉之。全祖

望謝載剝還載招。瀘泉力斧冰。顧之麟寸田蒸饅氣焚藹。汨汨醅汎缸。吳城甌亭濃濃乳傾榼。宿辦勝咄嗟。丁健祖

起占噬嗑。坐疑集梅林。汪啓淑秀峯圍如禮花塔。不待木魚呼。穆門何煩齋鼓鞞。素甌滿同盛。江聲淨饌齊一呷。甘

芳滑流匙。樊榭磊塊利用挾。羣喋訝水鳧。顧林餘瀝施簷鴿。口香聞諸天。龍泓腹果傲古衲。利益瞿曇云。董浦家風

靖師答。緬思烹穀初。謝山軒后澤溥洽。玉井象昭垂。寸田囊饘紀職納。人皆依食住。顧亭俗始理生陋。貴或糅元

黃。誠叔三品侈和雜。貧或點齏鹽。秀峯七寶爭嘖嚙。或詭名目奇。穆門料斗說闔闔。或困衆指繁。江聲舖歔沸吹欲。

魚傳放翁詩。謝膏載叔庠劄。寒持濟軍飢。林晨炊恤僮乏。何如我輩閑。龍文史共歡狎。蜡飲用上寅。浦並談

議資某甲嶺。梅吐萼纔。謝山茶破紅恰。騁辭筆紛飛。田搜祕神有嗒。節物鬪朋賤。亭故事徵梵夾。流連至

纈黃。誠新月照簾押。秀

臨平道中

隄畔人家望轉遙。映山臨水竹蕭蕭。風回微雪瓜皮艇。雲破平林板凳橋。

張龍威招同陸南香紆齋耐士諸君集弄珠樓

為選東湖勝。相攜上野航。層波圍酒地。疎樹入漁鄉。舊雨前期在。新晴客思忘。十三回月子。流照一樓霜。

東湖月出回船中流有作寄舒明府

留人月似東湖主。也逐船移浦激開。直擬君山吹笛去。渾如神女弄珠來。寒驚白鷺一羣起。春逼蒼龍七宿迴。尚憶連宵趨府客。不同婪尾試深杯。

葉東宿招同人集德藏寺僧房以食隨鳴磬巢鳥下行踏空林落葉聲為韻分得磬字

突兀雙塔昏。斜陽下荒徑。離立僧影收。林葉已無剩。茲游值深臘。吟伴有高興。作禮觀師瘞。環洲微汀澄。殘碑不可讀。遺恨入烟磬。蜂房自開戶。初筵潔早釘。茶聲沸庭陰。月色破池暝。寺有山微意宵莫尋。清言

往如贈。伊余淺學人。久習迦葉聽。願參滄浪禪。勿作小乘證。

葉迎坡陸紆齋鮑咸吉諸君招集南莊探梅

春到江南早一分。林亭窈窕集同羣。巡廊共訝溪痕活。坐石偏忻鳥語聞。幾粒松風留舊臘。數椒梅意動斜曛。故園歸去辛盤近。回首離情指暮雲。

同作

張雲錦

一棹荒寒路幾經。殷勤梅信報園丁。人來淺水綠邊汊。花問夕陽紅處亭。昔酒香仍消醅酌。春懷淡欲入空冥。試燈節後應全放。待折橫枝向膽瓶。

汎舟出東新關。至臯亭看梅。同周穆門。杭堇浦。梁葭林。丁龍泓。吳甌亭。汪秀峯作。

以下丁卯

春山秀北郭。悵望情有餘。中藏萬樹梅。白雲誰所鋤。獨往興易盡。高唱孰起予。同舟五六人。皎若英瓊琚。推篷認芳草。把卷沿清渠。斜陽纔半嶺。薄靄風四除。撫迹已成昔。言歡方在初。幽姿照水際。的的久離居。

晚由金家堰步至崇先寺

一峯抱花迴。不知凡幾里。遲日落未落。散策從此始。石梁跨澗空。苔枝皆倒倚。入寺罷晚參。僧堂寂如水。詰曲取微徑。返景照花裏。瀾漫徧崑壑。春透無剩藁。乍疑吐佛光。白毫映霞紫。復訝妙香生。秘薛得禪髓。盤桓憩松根。結茅擬來此。何必問通波。遠尋光福市。

宿臯亭山下田家

山中無節物。新月在茅檐。主人肯留客。遂爲信宿淹。夜久春氣和。露下衣微霑。步步踏梅影。晝格參濃纖。悄然諸峯靜。不覺更漏添。歸尋一枕夢。酒家指青帘。

游中塔院遂歷上塔院

橫山分小支。犖确勢如窞。長林交青蒼。老藤結蛇蚓。中塔峙其半。新構極峭緊。稽首問導師。燈傳本無盡。眞歇了禪師。有無盡燈記。輕陰羃屋角。欲去且復忍。須臾裂層霄。幽禽語相引。槃跚到上塔。修竹密于鬢。懸崖曠以平。古榦壓巖嶙。冰花間綠雪。微罅見遠眇。相對澹無言。笑爲東風颭。傳聞塔中仙。在世只悲憫。至今山君馴。夜護階前筍。上塔歸藏眞禪師。有伏虎事。

桐塢

桐塢我舊過。陰森翳叢篠。隔林見梅花。謂是山月曉。花深不辨徑。地寂唯聞鳥。但看香雪繁。似覺青翠少。此中饒僧廬。粥魚出烟杪。後游鬢絲增。初春澗聲杳。無事爲佛事。益以詩自繞。

下塔院

有月明果禪師塔一名月明菴。

臯亭西麓深。名僧樂幽阻。誰知下塢藏。亦復近在渚。菴前有池。門前萬梅龍。玉鱗待飛舉。或娟然若盤。或凝然若佇。俛或若將攬。翹或若將語。涵吐逆風香。供養藥上侶。當年日中機。委蛻捷無拒。何處閱真空。晚鐘清一杵。

撒沙夫人廟

相傳神爲倪氏女南渡初避寇奔匿蒙犯風雨瘡痍而卒里人葬之山中後金人南侵神著靈異撒沙退敵事聞封爲護國夫人建廟祀焉

臺殿高切雲。北山山半出。下視花海鋪。上蔭松障密。薄暮一躋攀。迴風送蕭瑟。翠帷映金燈。香霧蒙玉質。在昔建炎初。兵氣纏駐蹕。神生正笄年。走避致愁疾。守貞隕空山。退敵合仙術。沙揚灌壇雨。氛蔽東皇日。傳乏更生文。記無令升筆。惟有村女兒。酌醴歲勿失。

哭趙谷林四絕句

卅載心交類飲醇。道南宅近更情親。誰知漸老多寥落。纔入新年哭故人。
疎泉移岫不離家。扶病猶思踏月華。寂寂西池人定後。吟魂應是繞梅花。
徵車同上話晨昏。往事回思一斷魂。可惜空摩烏集闕。而今忍見鴛巢門。
短牋猶在淚痕多。萬事風花瞥眼過。還似修文深巷裏。十年殘夢喚何波。

用林艾軒哭徐剛定詩意

臯亭雨泊同穆門董浦甌亭

月黑臯亭夜色虛。一篷風雨傍閑漁。蕭蕭破夢三更後。恰恰欺花二月初。小舫得爲聯被宿。深村大好閉門居。篋中幸有吳牋在。滿幅春愁翦燭書。

構李舟中春寒

風尖篷背雨初乾。笑攬茸裘且自寬。百里圖經吳界越。三朝天氣暝翻寒。周遮鶯語依前澀。禁勒桃花不

放殘漫道單棲最惆悵。陸家賦後詠尤難。

宿張龍威藝舫

移船來柳浦。黹燭坐書巢。隱霧城烏翅。垂星屋樹梢。詩從謀野獲。人是出門交。掃榻能留宿。靈辭酌滿匏。

東湖嬉春曲張龍威席上作

深鼻鵝黃淺撥醅。出城便逐野鷗來。東湖小有銷金處。老子嬉春第一回。水檻花廊位置存。南莊易主石無言。人生何惜尊前醉。幾見平泉到子孫。

一片波明與柳連。水西亭館矮於船。杏花淺破紅闌笑。似喚韋娘向酒邊。
明嘉靖中禾妓杜章最有名。

報答春光有數公。弄珠樓外夕陽中。留連須盡湖天景。莫待明朝雨又風。

葉迎坡信臣陸紆齋耐士招汎東湖分韻

晴波渺渺鴨頭新。比日蚤緣不厭頻。草色居然迷客子。花光也復惱禪人。時南屏讓公在坐湖頭舊俗工挑葺。船尾行庖細膾鱗。莫道無山供望眼。天邊九點淡螺皴。

當湖馮孝子綺扶櫬歸里圖

萬里雲中櫬。扶持淚滿襟。山行石齧足。江渡浪驚心。歸葬神應助。捐生願更深。孝家看表里。竹帛照來今。

南史太原王知元居剡縣丁憂哀毀而卒。陳宣帝詔改所居青苦里爲孝家里。

曉次臨平風雪大作。晡至臯亭始晴。三十里中桃花正盛亦一奇也。

歸舟火急趁花期。作冷開晴故弄姿。粉灑亂紅飛雪裏。金泥碎錦夕陽時。雲山烟水如相護。酒幔茶檣任所之。萬事豪華付公等。天公此段獨吾私。

小寒食日同穆門鹿田江聲鸚亭諸君汎舟湖上用楊鐵崖花游曲韻。

滿湖春靄山空濛。雨微潑火花從風。畫船平底如屋裏。撐入琉璃拍天水。藏鴉門外水侵門。霏霏吹溼綠羅帶。松鬢券臺延細步。紙灰不到逋仙墓。諸公豪氣忽飛來。笑看湖小坳堂杯。喚起龍吟戛銅椀。墨汁淋漓汚詩版。酒邊應記儂家西。卻借少陵翻舊題。白頭那作砌臺使。楊柳三眠橋第四。吟成何用康成牋。年年願續花游篇。

城北汎舟看菜花同人分韻

三四吟朋一葉舟。踏青過後菜花稠。連畦金粉雌雄蝶。十里斜陽子母牛。北郭不來游女賞。東風都屬野人收。分明佛界周遭外。襯出紅橋碧玉流。

上巳日同人攜酒酌顧丈月田墓兼修禊事於湖上仍用楊鐵崖花游曲韻。

入春水厄如玉濛。鬢絲輕颺茶煙風。佳辰解禊晴景裏。一桁浮嵐低著水。人生安得追羨門。太清抗手接飛翬。夙好殷勤迴故步。酒香草碧鶻啼墓。知吾曹不詎復來。北魏裴伯茂卒友人常景李暉等十許人于墓旁設酒置祭哀哭涕泣一飲一醉曰裴中

書魂而有靈。知吾曹也。 傍湖亭館看流杯。山茶初開大於椀。柳外歌船催蠟板。嬌鶯雛燕度橋西。凝望何人控月題。若箇當年花鳥使。樓上垂垂簾影四。呼童著意擘吳牋。爲君重賦蘭亭篇。

吳甌亭招同人集繡谷亭看藤花分韻

空亭老藤一千尺。高格出屋枝連簷。纔過穀雨好晴色。入門蜂子喧聲添。春風披猖花爛漫。香氣直透鄰家簾。當年亭中老居士。尊甫尺。堯先生。芳時招客情所欣。昔遊已逐仙夢斷。但有遺墨留霜縑。郎君愛此等嘉樹。廿年杯酒還重拈。話久飛英墜朵朵。坐來弱蔓搖僂僂。乍疑天女下雲際。華鬢麗毳垂蜚纈。瓏瓏壓架開新葉。青帝弭節遲朱炎。歡場況是害馬少。拇陣更數潛蚪兼。席中不飲莫如我。看客傾盡知無嫌。更誦淮海藤陰句。感舊滿襟清淚霑。

送舒雲亭明府還京二首

送春兼送客。湖上夕陽船。欲折蘋花贈。相將別思牽。後期如此水。前事只經年。不斷吳雲影。迢迢直至燕。知君風雅意。爲政及前修。夢裏烏仍哺。官中犢尙留。郵籤攜盡室。津樹引扁舟。長物隄塵在。何須二頃謀。明府酷好古墨。購數十笏以歸。

同人集汪抱樸復園送春分韻

楊柳池塘十畝寬。綠陰陰處有餘寒。青梅薦酒情何限。白髮傷春別更難。繞徑殘花閑步履。點波細雨獨

凭闌年年迎送常如此。剪燭題詩且罄歡。

五月十五日客廣陵馬半槎招集小玲瓏山館爲展重午之會出諸家鍾馗畫索題予得出獵圖老馘駿騎風蕭蕭一陰生後爲夏苗嘯梁之類聚若齒鬪目用命無敢驕後勁鬚鬚各有執繩牀背負攜罌瓢唐裝挾簿似從事數獲且待盛諸策前驅何所見醜怪兼跳踯或對持赤梃肅若官趨朝或牽黃臂蒼或鳴鉦吹箏或建中軍鼓齶齶振雲霄或樹大將旗獵獵吹招搖元豹或鎖掣豪豬或叉撩此皆偶中耳老馘沈機密算慘不驕半塗突出遭跡虎相顧動色馳羣驍蹶張在地弩交彀投石向空距獨超椿喉戈長夾大斧欲除世害祛佞妖天寶年間楊李輩翼而冠者如麤貓老馘胡不殪其黨忍使三郎遠幸萬里橋今來畫裏展重午徒然策勳酌爾桂與椒

廣陵苦熱賦何處堪消暑四首效香山體

何處堪消暑暑消泉響邊竹中醜白雨湖底瀉青天浙浙侵肌爽泠泠入耳便韜光石橋畔憶此已翛然
何處堪消暑暑消幽洞邊佛棲深作屋仙遇別爲天乳滴絺衣冷泥行竹杖便青林通別竇赤日更凄然
何處堪消暑暑消深塢邊雲多中有梵篁密上無天樵穢人誰到拖挈性所便法華西去路山翠正蒼然
何處堪消暑暑消僧閣邊松風灑翠壁鳥影度湖天蔬食安清儉櫻糝學靜便南屏讓師在懷我定般然

邵文莊公溫硯爲西疇作

溫硯銘暑有發冰寒有驅火既濟且和變理在我彼鼎我硯制殊義同汝革汝從惟金在鏘功成斯文而不自有左右實諸歲寒良友二泉邵

寶著錫山
安國製

梁溪江左勝。山水清且幽。扶輿磅礴氣。多產賢達儔。邵公早解組。吾道困幽憂。北寺壽朝宇。南陔樂林丘。後來高顧輩。公先導其流。東林事孔棘。不及公優游。觀公溫硯制。剗物匪瑀鏤。讀公自造銘。寓意深可求。漫學水火爭。當效變理謀。彼鼎或時覆。我硯常有收。範以金從革。湯沐合賜休。貯以石虛中。卽墨行封侯。功成在構炭。文出如蒸餾。耐寒此故交。附熱豈足侔。安氏邑大姓。膠山理菟裘。重祠李忠定。公撰迎神謳。安國重述膠山李忠定公祠公爲作記。侍公超然堂。堂在二泉書院。良冶爲公鳩。牽連宜得書。捧硯榮全牛。方君雅好事。什襲比琳球。拓詞費瓊椎。徵詩徧遐陬。當共竹爐卷。永永傳千秋。惠山有王孟端竹爐詩卷。

方君任見示後周西嶽華山碑且索賦詩。天和二年。方紐于瑾撰文。趙文淵字德本奉敕書。

方君好古人。共知探討金石忘。飢疲炎暉堪畏。早過我。手示宇文西嶽碑。非狐非貉本篡竊。明月墜後魏。祚移天和之際。主英毅。關中形勝邦家基。素祇首重豫州鎮。嚴恭祀事無敢嬉。文先歸美亦有體。諂晉公護殊可嗤。禮樂應自天子出。奈何冢宰侈其詞。碑云。大冢宰晉國公任屬阿衡。親惟且爽。彌諧六樂。緝熙五禮。使非含仁殿。平內難。神器不待楊氏窺。題云。方紐于瑾撰。系出唐裔。賜姓爲當年代族九十九。此其一耳。居山陲。趙明誠金石錄後。碑跋云。實謹子也。謹後魏千栗。子洛拔之後。余家有洛拔子烈碑云。遠祖在幽州。世有部落。陵山之北。有山號萬紐。千者公之突葉。居其原址。遂以爲姓。典午推寅世。遞嬗因生胙。土紛難追。文淵隸書兼籀篆。奉敕稱字固大癡。褻回更憶達奚武。請雨華岳剛同時。攀藤直上玉女頂。白

衣見夢甘霖施。於今江介方苦旱。安得長吏虔如斯。爲君賦此已夏杪。客窗悵望涼颼吹。

題嶰谷所藏郭河陽寒風密雪圖

宋已無李成。寒林尺幅徒強名。今尙有郭熙。官畫風雪重見之。主人云此來京師。珍重出自我友貽。不用
明窗拂蛛絲。滿堂寒色動鬚眉。峩峩羣玉峯。下積陰靄濃。皎皎千樹瘦。上絕窮鳥影。但聞虛牝怒號飛。湍
哀馬蹶得得翻銀杯。擔囊危棧胡爲哉。誰家寬幃柴門開。別有凍粟生樓臺。浦淑一色相縈迴。幽人高臥
無人猜。熙寧天子多清燕。詔遣從容埽束絹。是時相公成法變。豈悟涼雱將集霰。圖成高張清暑殿。不數
十年同席卷。蠶壓明昌眼中見。歌聲又唱青山轉。青山轉亡金時謠也寶繪流傳仍自汴。零落宣和幾宮扇。何如坡
谷詩才擅。發興春山玉堂院。

秋日嶰谷半槎餞予平山堂分韻

何限憑闌意。披襟已颯然。天清隋苑樹。秋蕩海門烟。旅望無千里。留題有卅年。離心逐涼葉。并墮遠峯前。
八月十七夜。吳甌亭招同人集吳山看月。分得風字。

今年陰雨秋正中。重修翫事開晴空。吳剛斫卻桂花朵。清光要與朋儕同。伍子山頭試飛步。石闌干外何
迷濛。萬家樓閣墮烟海。但見幾點疎燈紅。羽人把酒勸客醉。吹笙更喚雙玉童。曲終老眼忽搖蕩。霜輪漸
上滄溟東。一痕碾缺勢尙滿。古時不見今安窮。恍然置我素鸞背。乘此浩浩青冥風。下視城郭皆倒影。微

茫莫辨江山雄。平生每笑塵世隘。膠膠擾擾如蟻蠓。虛明無礙拓胸次。羣仙招手蓬萊公。只愁淪謫任游戲。依舊石畔聞鳴蟲。三更露下且歸去。回頭碧樹窺玲瓏。

秋日同穆門江聲葭林竹田甌亭汎舟至湖心寺

小別湖光又共探。放船秋色徧西南。青山白鳥大圓鏡。折葦枯荷古佛龕。人影靜隨雲影倒。詩情淡與道情參。涼風最戀蕭條趣。漫倚前汀漱晚酣。

九日同全謝山吳甌亭諸君遊城東報國院

寂寥九日也。恩恩乘興同。過古院中。蔬圃蟲鳴秋境界。竹房人語佛家風。黃花且止盈樽酒。碧水聊窺兩鬢蓬。更有斷腸成昨夢。神清無復到城東。昔符生聖幾嘗同游此。今下世已十年矣。

月夜唐樓舟中同謝山作

故人襟被共出城。疎林明月唐樓行。悠悠徒抱文字癖。落落但話江湖情。四十五日夜方永。一百八聲鐘最清。朝陽初上睡翻著。船頭已見含山迎。

溪行

溪行堪竟日。枝港雜清渾。晴景開帆色。微霜落水痕。詭魚黃葉市。誇酒白蘋村。物價年來貴。飢驅不復論。與謝山偕往廣陵。予至吳門。疾作遽歸。謝山有詩惜別吹韻。

生來僧祐偏多病。同往林宗又失期。兩點船燈看漸遠。暮江惆悵獨歸時。

歸舟力疾游烏戍三寺各得絕句二首

密印寺

梁昭明太子讀書處

青墩烏戍近比連。蟹舍菱塘繞一川。病客愛來尋古寺。前生或有打包緣。霜葉蕭蕭下古廊。人傳帝子讀書堂。蕩舟去後生天早。免見青絲發壽陽。

普靜寺

沈休文捨宅

梁朝佐命齊家令。燈暗伽藍長野蒿。捨宅捨身應一例。暮年何止懺分桃。沈約懺海文云。淇水上宮曾無有幾分桃。斷袖亦足云多。冷落僧房樹下開。瘦腰想像獨裴回。祇憐一代風騷手。邢邵曾容作賊來。

壽聖寺

寺塔俱梁時建。宋陳去非居此有芙蓉浦月華池。

晴日如春望轉述。興來踏徧幾招提。雲光東塔過西塔。水勢車溪入爛溪。

風鐸交喧寶網新。時寺塔新修簡齋小住覓遺塵。白頭落托詩名賤。空憶芙蓉浦人上。

餅花齋百八瓷酒器歌

吳君尺鳧故物合嗣敦復乞詩

君不見。鄭泉酒人稱大戶。化身願作陶家土。繡谷先生歸道山。酒器駢羅一一精魄聚。何年筮坎六四爻。有酒用缶不用匏。弁星值斗斟且酌。鏤金刻木徒相嘲。綠瓷賦鄒陽。風氣自此開。孝威埏。叔夜杯。與夫柴。

家雨過天青好顏色。俱隨劫火去不回。瓶花齋中霜葉亂。觴客香膠互持玩。建甌高捧兔豪圓。定盃低傾紅玉半。中受五斗甌製同。小則二升之觚四升觥。其數一百八件有如念珠曹麴部。風流舊公案。前明供飲盜最多。永厚宣薄羣摩挲。串金番蓮發五彩。蓮房桃實交雙柯。醺壇茶瓊肅皇造。今日坐上驅使卷白波。只無穆廟窳。僻畫於焉託彷彿。廣川屋壁東昏閣。酒德未終色荒作。追思雅意滌哇削。法士毋譏腐腸藥。長公繼美清且賢。醉鄉之後人爭傳。要客更唱飛朋牋。衛公故物胡能然。就中我愛小觥船。不醜亦復堪流涎。鬢絲禪榻非當年。故人久作騎鯨仙。

同作

張雲錦

繡谷亭主嗜古兼好奇。百有八種傳酒卮。瓶花齋中我曾到。張筵惜未一見之。紫藤花開復花謝。此幸不與銀杯化。或云數應寒山鐘。鯨吞彷彿聲春容。或云數合牟尼珠。戒彼沈湎列座隅。以我觀之殊未是。觥錄事司卽在此。一器祇宜一客專。大戶小戶分陶埏。惡客僅許躡背瓊。放士頻勸花稜船。定州之白汝州青。兼以越州祕色之鮮妍。或淺斟而輒止。或急觴而遞傳。乃信道不離飲器。千鍾百觚有深意。負才不遇可奈何。徒留手澤今傳視。不羨蘇晉曲室五萬枚。還勝元載熟物三千事。故家篋笥寶金玉。爭及佳盜能不俗。式仿考古圖。燒從提舉局。留青日札宋南渡有邵成章提舉號邵局置窰造青器櫻眼蟹爪新製摩。瑩粉堆脂芳氣觸。博物要覽汝窰色卵白汁水瑩厚如堆脂然汗中櫻眼隱若蟹爪前明窰器列朝分。雞缸尤推宣廟獨。縱遲名酒瀉餘杭。歷歷

鐵題看亦足

慰意林悼亡

難問高穹竟渺茫。看君憔悴鬢新霜。情如微子偏傷逝。時先有令兄谷林之痛才似安仁又悼亡。多事雁聲啼夢破。無端魚日照更長。春椒將獻高堂壽。應減中宵淚兩行。

歲暮連雨初晴竟不成雪

夢破南窗海日烘。嚴凝縱罷雨兼風。徒傳龍媪祈冬雪。不遣鴉娘呪歲豐。李峴幾時令粟賤。孟郊底事坐詩窮。一旬尙遲青幡信。催取天花落半空。

元夕集吳甌亭齋中賦武林踏燈詞四首

以下戊辰

卽漸冰輪特地圓。幾年無此好燈天。若教兩夜添晴色。不負錢王買夜錢。鬧蛾叢裏鬪新妝。去點吳山十廡香。學得吳中低髻子。阿誰百媚在中央。

詩人家住薦橋街。處處看燈此處佳。翻破存齋新樂府。底須碧玉拾遺釵。明瞿長史宗吉居薦橋見歸田詩話有燈詞十五首甌亭亦居此地

雙柳垂鬢竹馬迎。映紗籠燭最輕盈。兒童也識熙朝盛。一色春旗寫太平。

舟行餘杭道中。入西溪。同穆門。鹿田。江聲。設林。龍泓。柳漁。竹田。甌亭作。

昔游大滌山。蒼蒼在天際。扁舟似向之。轉鼓溪口柂。春晴多斷流。芳信恐成滯。尋真遠未就。假道紆有計。隱見數峯尖。屈曲隨岸勢。居人盡田家。宿處問漁弟。日落村煙生。疎梅耿幽翳。今宵話燈下。身事同不繫。

西溪山莊曉起看梅

入望林端白。幽禽出竹飛。地偏春作主。花好客忘歸。香氣濛初日。橫枝近翠微。逃禪工畫本。千樹見應稀。

西溪山莊有感

闌壓垣衣戶網塵。嫩寒惻惻那禁春。一池好染羅帶水。只照梅花不照人。

汎舟河渚過曲水秋雪諸菴二首

蘆錐幾頃界爲田。一曲溪流一曲煙。記取飛塵難到處。矮梅下繫庫篷船。

永興寺觀綠萼梅

西溪風土我所愛。衆國裏紛脩態。元章大叫梅花王。永興二株乃前輩。竭來日晚佛屋深。竹翠嵐陰交。睡暖無多落照上。花梢賞會令人增感槩。少年見此全盛時。盈畝空園被花礙。巡簷斛斛堆綠珠。染袂珊瑚潑濃黛。一株忽受冰雪折。空腹醜然古根在。扶持不得山僧力。槎枿仍抽凍蛟背。疎花數點生意回。倔強天教閱人代。海月多情魂爲返。松風相响寒先退。題詩苦憶東澗老。祭酒親栽今豈再。梅爲明神廟時馮具區先生手

種錢牧齋有共憐祭酒風流在。不惜看花道路賒之句。隔溪橫笛莫輕吹。一勺清泉向花酌。

自木橋至宋輦道中作

籃輦行穿曲復深。春雲淡淡竹陰陰。平橋正對青山出。古道曾傳翠輦臨。燒筍他時成故事。探梅此日有同心。嗟予會逐風埃去。禪板詩瓢約重尋。

南屏山房訪讓山上人

經年阻幽踐。覓路出高松。湖色浮空曲。雲陰過別峯。禪餘寒尙在。話久午初逢。自笑瘦居士。偏宜筍蕨供。同讓師汎湖看新柳

隄上無窮柳。春來那忍攀。絲長初蘸水。綠淺不遮山。煙態思前日。風情媿老顏。阿師觀物幻。相與棹舟還。七寶山三茅觀同人春望

茲辰風日美。閑客此閑行。竹暗青藏磴。江春綠抱城。唐鐘隨火去。宋牒與苔平。鶴背茅君下。應悲世幾更。花朝雨中同人汎湖分韻

六扇青篷載雨低。雲行只在衆峯西。飛來詩句渾如溼。催放花心半未齊。罰錢乍呼鷺屬玉。游驄不到惜。鄆泥畫成水墨施。家樣剩有袈裟許。共攜時恆公在坐

薄暮出湖上至恆公方丈同人分韻

好遊今尙有遺風。陳唐卿云。杭人好遊。自緩緩歸曲始。春月招尋得數公。掠段家橋昏綠外。到孤山寺水煙中。靈雲舊話桃花在。慧遠心期蓮漏同。此夕清歡應不寐。將船留繫曲廊東。

春湖夜汎歌

晴湖不如游雨湖。雨湖不如游月湖。

二語出明張合宙。載乃當時杭諺。

同時看月兼聽雨。二事難得魚熊俱。沙外登舟櫂

徐撥。天融山暖雲初活。水月樓邊水月昏。

李嗣戒菴漫筆云。杭湖船精妙者曰水月樓。

煙水磯頭煙水闊。葉公祠乃張太宰煙水磯。見錢心卓筆記。

今曲院風荷亭子皆其地也。

尊前綠暗萬垂楊。月痕似酒浮鵝黃。一片蛙聲遙鼓吹。四圍山影爭低昂。此時坐上各無

語。流雲走月相吞吐。欲潤冥冥隄上花。故灑疎疎篷背雨。合成芳夜銷金鍋。繁華千古隨逝波。誰把長橋短橋月。譜入吳娘暮雨歌。雨止依然月不見。空裏湖光白如霰。歸向龍宮枕手眠。粥魚初喚流鶯囀。

四照亭曉望

孤嶼亭空斂曉煙。袂衣初試鬪輕便。諸天宮殿琉璃上。二月湖山錦繡前。紅雨欲飛驚宿鳥。碧波不動待游船。詩成散入城中去。破費家家十樣牋。

雨中柳漁招同諸公汎舟北郭看桃花。用少陵江畔獨步尋花韻七首。

暎晴預作看花約。無奈一宵風雨狂。司家橋頭進船路。三尺水滿上魚牀。天桃穠李上河濱。雲霧濛濛溼好春。雨師若借霜威避。東道應知是主人。

村迥港曲見漁家。帶雨飄來幾片花。盪槳應知有春色。打篷幸不在天涯。
半山山半出雲烟。無處花多不可憐。七娘子廟何人到。折取繁枝供几筵。
半山七娘子廟崇善王妹也。見咸淳臨安志。
不辨花源西復東。年年花事雨兼風。鴨頭依舊十分綠。人面可如前度紅。
柴門臨水自成蹊。吹溼青青酒旆低。桑眼含時未蠶浴。花枝重處有鳩啼。
莫愁衝雨回船早。明朝看卽落紅催。老夫一春好懷抱。不向花開何處開。

放船自孤山至湖心寺作

山螺翠寫午晴餘。艇子沿緣興未疎。草比帶腰猶淺淡。水如鏡面更空虛。
載來雙笛楊公濟。坐共孤禪孫太初。前輩風流應不遠。倚闌斜日爲躊躇。

宿南屏讓公房用東坡病中獨游淨慈韻

笑拖雙屐入空山。借榻松風竹籥閒。得得來遲如有約。騰騰游好許誰攀。
禪燈照影詩皆瘦。客枕和雲夢亦閑。更愛點茶三昧手。火前曉試不知還。
五燈會元。洛京福先寺仁儉禪師。放曠郊野。謂之騰騰和尙。萬水千山得得來。真休句也。是日與讓公汎湖歸。故云。

曉發南屏渡湖歸舟中寫望

乍解輕舟曉色交。僧房回首小於巢。一湖春水窺山影。十里初陽上柳梢。
爛漫狂名幽鳥識。參差老態野人嘲。游蹤未逐香塵動。遠聽漁榔隔浦敲。

三月三日同穆門。談林竹田。恆公。酌顧丈月田墓。兼修禊湖上。分得之字。
料峭東風上巳期。故人一去更何之。經年來酌橋公酒。此日空題逸少詩。渲碧湖寬春雨後。滲金山好夕陽時。回船不盡餘寒意。安得英靈共此奇。

寒食日同穆門西顥集湖上時西顥自閩中歸。

水蒲風柳綠黏天。有客初回嶺外船。冷食正宜供輦腳。幾年相見各華顥。茶香僧舍催新火。花落湖隄逐暗泉。他日幽居如可卜。放生社約白鷗邊。

晚春初霽大恆讓山二上人招同諸公集南屏山房看湖上新綠分韻。

衆壑斂殘雨。高窗萬綠添。風光動深樾。山翠滴虛檐。密映晴絲卷。香分細草兼。下方新畫就。濃黛染重簷。

樊榭山房續集卷第七

詩庚

月夜泊吳江

兼葭望極淨無烟。小泊秋娘渡口船。對月心情多往事。阻風滋味又今年。江空列宿依人近。夏淺餘寒與水連。正是清和好時節。潛蚪光動不成眠。

游水木明瑟園簡陸茶塢二首

小舫閑停岸。輕輿遠繞村。言尋甫里宅。不減辟疆園。水氣涵虛閣。山光隱短垣。夏帷紛衆綠。暫此息塵喧。
僂指中吳勝。如君有幾家。亭留高士跡。中有介白亭爲吳賦並小園誇朱竹垞先鹿柴陰連竹。魚幢俯浸霞。主人何處去。山僕且擎茶。

由上沙登靈巖山寺

山迴似馬奔。天低但鶴沒。籃輿上沙來。吳宮問禪窟。酸嘶歷甃甃。喘汗凌坳凸。人勞怯衰步。徑轉得清樾。君王昔游宴。鑿翠構華椽。誰知水犀沈。永作金仙謁。屨廊旣湮蕪。琴臺空突兀。皓然太湖陳。勢欲吞溟渤。東西雙黛浮。帆影望超忽。鴟夷去不回。古豔久銷骨。焚香禮斷塢。捫苔讀遺碣。擬聽夜泉聲。松閒弔烟月。

元僧惟則師子林。今爲齊門某氏園。泛舟往訪。關者以閨人居此辭焉。悵然有作。

名僧遺石在。迢遞訪前塵。北郭圖難覓。徐幼文有師林十二景圖東林社未湮。不逢澆竹叟。偏住散花人。悵悵迴船處。

溫風蕩綠蘋。

召伯埭

開帆廣陵郡。似別故鄉時。古埭傳遺事。垂楊繫遠思。鳴鈺估客舫。吹笛女郎祠。稍喜湖天闊。風蒲舞鷓鴣。

淮城寫望

旅泊孤城外。長淮入望勞。天形倚蓋遠。水勢築垣高。快雨鳴葭屋。涼風透苧袍。重過枚叔里。蕭瑟感顛毛。

午日淮陰城北觀競渡四首

此日家家喚艇行。一灣野水是新城。無人更說防淮事。烟柳風蒲到處生。淮安新城爲明福藩時築

驚飛沙鳥兩相呼。鏡鼓緣流引客娛。不分午風涼似水。爲他兒女颺釵符。

誰家林際小園亭。過盡豪華物態零。幾折虛廊通淺渚。壞橋無柱上浮萍。

吟朋應是憶天涯。舊曲樽前小字斜。丙寅午日與甌亭敬身諸君湖上賦競渡曲猶有洛蘭遺俗在。晚來閑過賣漿家。

晚渡黃河

聞道呂梁險。東分此地寬。緯蕭詢土俗。翦紙祭波官。落日中流赤。長風五月寒。高堂念游子。舟楫報平安。

嶧縣待牓呈沈侍御椒園

京洛十年別。相逢鄒魯閒。汎舟君有役。時椒園以僮倚楫我多艱。官燭南牀話。離杯北路顏。高情得津送。

圓月墮前灘

過微山湖

青山去遲遲。風柳吹靡靡。湖空生白雲。何處弔微子。

魚臺道中

為春秋棠邑魯隱公觀魚處

推篷纔睡起。入眼似江湖。小鴨隨孤艇。連山出短蒲。矢魚沙戶慣。庠馬水村無。且喜緇塵避。甯愁好句逋。

南池拜杜少陵祠

太息杜陵叟。空垂萬古名。文章羈旅賤。身世腐儒輕。勝地跡猶在。荒池風自清。迎神有新曲。讀罷一含情。

祠為椒園所瓶。有碑甚工。

避暑河干佛閣時守牓任城六日矣

守牓復守牓。一朝還一朝。淹遲如此少。熱惱豈能消。佛影依高棟。天風對麗譙。他時思在莒。只合樂顏瓢。

嘉祥書所見

落日嘉祥縣。人家早閉門。如何大陵氣。偏照阻飢村。怪鳥兼遙哭。殘蠅聚亂墀。二東膏澤徧。猶有未招魂。

六月六日舟中寄查蓮坡

六月六日寺前牖。客子枯坐愁書空。岱雲膚寸幾時合。汶水涓流何日通。豈有詩篇傳濟北。漫將米價問江東。時聞江浙米價騰貴美人咫尺勞相望。尙隔津門烟樹中。

題查七倫鑑白圖

風流橫漲橋東客。河上相逢各行役。鬢鬢三十頗有餘。未點吳絲一莖白。幾時阿堵爲傳神。苦吟幻出郊島身。平明攬照忽自訝。春苗那作霜菅新。如予衰老藏漁釣。偶逐風塵供姍笑。刀圭乞取湏難緇。輸與長楸衆年少。看君射策銀案前。領髭早摘何翩翩。從今鏡鑑真堪擲。但數持梁蔡澤年。

汶漲

五汶一宵發。遙從泰岱東。灌河聲挾雨。入牖勢分洪。舟楫今朝活。囊錢兩月空。蒼茫雲霧外。何處答神功。

月夜謁分水廟作

芒芒禹蹟畫九區。千年距野更須臾。大河南徙伏流斷。惟有轉漕爭川塗。我來涼月出深樹。清鐘未絕靈祠趨。祠前地勢若覆盎。銅丸注坂兩下俱。古汶西行正當面。蛟宮貝闕根虛無。擘流彷彿似彭蠡。馳波相背漂以輪。南帆北柁競望此。箭筈脫手荷傾珠。村氓離立話遺事。壅遏詎匪由人乎。白老奇謀戴村築。東逝那復滄溟紆。太倉紅朽賴一綫。萬斛傳送如輕鳧。奈何利害互倚伏。頻遭秋潦飢難蘇。衆神部署有主

者。誅風刑雨功非誣。溝渠不溢百穀遂。田家旦暮歌烏烏。治粟都尉奉牲醴。飫及介卒兼鱗徒。

東平

鄆州東下會通河。小艇乘流疾似梭。地憶須句風物古。都經劉豫廢興多。雨能消暑濛濛至。山不知名淡淡過。垂老那禁行旅感。每逢佳處一高歌。

晚泊張秋鎮

薄暮初收雨。維梢著處家。斷虹遙飲海。返照倒明沙。卒律愁煎餅。奔渾笑煮茶。吳杭炊柁底。一飽任天涯。

東昌阻風

伏日舟中聽曉雞。無端風雨共淒淒。浮雲西去遙連魏。綠樹南來漸入齊。災後名區絲竹少。病餘舊僕語言低。愁城如許攻難下。一矢書成亦枉題。

南皮

南皮城下水灣洄。悵望空尋讎友臺。季重子桓俱已矣。浮瓜沈李亦佳哉。百年勛業翻成恨。萬古胸襟不易開。我欲臨風弔遺跡。片帆正約白雲來。

滄州

蜿蜿高城四面通。遙看飛鳥沒長空。緣隄槐柳清風外。比屋魚鹽落日中。漢室望仙徒自苦。唐家橫海爲

誰雄。閱人只有滄波急。倚欄無言盡向東。

七夕查蓮坡招同英司馬夢堂吳東壁陳對瀛集南碕草堂以荷淨納涼時分韻得荷字。

羈懷不可釋。憚暑期烟羅。嘉招愜心素。南郭尋行窩。修梁百步餘。沾水通小波。絲楊盡踈地。彌望菱與荷。客來冷香中。遙吹銷煩痾。林蟬無輟響。秋思亦已多。坐中半故鄉。佳節感蹉跎。頽陽飛鳥外。新月層城阿。情話尊未竭。歸軒指斜河。

題蓮坡澹宜書屋種竹圖二首

北方種竹如種玉。幽人愛竹一叢足。略似黃陵古廟前。月痕照破秋烟綠。我家屋後百篔簹。夏雨吟風半畝強。莫怪披圖動鄉思。來時新筍正過牆。

蓮坡以佛手柑見餉賦謝

秋香新載海門船。分得兜羅別樣絲。恰稱客窗清夢後。偏宜書幌晚風前。悠揚突過千花氣。受用惟憑一指禪。我正迷方煩導示。須臾應有舊因緣。

酬英夢堂晚過寓齋元韻

海津多沮洳。高館傍古堞。閉門秋草長。無客共日涉。司馬方外流。趣遠神先愜。主人呼燈至。小坐聽風葉。即此尋元言。相期在白業。

晚過古春小築奉訪樊榭

遼海英 廉夢堂

游雲不滿空。返景下疏堞。佳人隔深巷。薄暮引幽涉。相違期非遙。相見意彌愜。微風亂燭影。涼雨鳴蕉葉。寂寞共西窗。惜此清淨業。

題方正學先生雙松圖爲蓮坡作

款云：洪武八年花朝寫祝丹崖老先生嵩壽後學方孝孺。

逐燕高飛兵甲動。金川門開浩呼洶。侯城先生真大勇。一語文皇魄爲悚。騎箕上天不旋踵。故友門生紛總總。慘淡金燈孤主擁。木末亭邊但遺冢。文字禁嚴衆胥恐。雙松若非牛革鞏。定是陰崖鬼神捧。流傳何年拂塵壘。玉軸綾裝鸞鵞。一株傾欹如病癰。作鱗之而疑象董。其旁一株蟻穿孔。野叉拗怒兩臂拱。偃蓋紛披白雲滂。寫祝丹崖唐應奉。肅先生署名端且竦。是年嚴君戍倥偬。初事潛溪角猶懸。洪武八年先主父克勤戊從浦江先生初。偶然墨戲與盆涌。勁氣貞心天骨重。韋偃畢宏翻傷鱗。澹宜主人寶若珙。出自千秋讀書種。白宋景濂游眼阿師詎懵懂。金幼孜胡廣諸臣生食俸。桃李爭春漫矜寵。

同作

宛平查爲仁蓮坡

凌晨客過展畫叉。再拜肅瞻文正筆。青天忽墮雙蚪龍。謾謾如聞風雨泣。我思此圖四百載。絹素雖殘墨精采。百靈訶護避劫灰。留與侯城集俱在。揮毫公正非角年。英氣早已腕底宣。花朝寫祝丹崖叟。應是上書代戊前。蒼皮溜雨明青銅。一松盤屈一摩空。似公東市就義日。慷慨乃攜哲弟同。長陵渡江紛

白刃公先諸臣慘相殉。當時榮悴何足憑。少師墨竹隨烟燼。戴冠灌纓亭集有題姚少師墨竹詩。

閏七夕。汪西顯自京來津門。蓮坡招集水琴山畫堂分賦。

飛絮漂萍少定蹤。西沽何意此相逢。天邊星漢剛連閏。人世朋尊不厭重。萬里征帆勞似鵲。西顯自閩至京往返萬里。一宵情話碎於蠶。子歸為報湖山侶。滿箸蓴絲待阿儂。

題蓮坡雙鳳圖。蓮坡子丙寅春夢雙鳳飛集屋榜各銜金篆字一曰真一曰福後納二小姬名適與之同因作此圖。

娉婷市裏見雙身。好夢分明證宿因。瑤水生來千百媚。彩雲飛下一重春。蕙蘭元是含貞性。風月何妨號福人。楊廉夫晚號江山風月福人。記取辟寒金上字。香奩詩話最鮮新。蓮坡著有詩話。

東堂觀劇四首次西顯韻

秋河雨後溼模糊。小部徵歌集飲徒。此是武宗絃索調。江南倦客得知無。章氏闌前許和子。岐王宅裏李龜年。為君留客殷勤甚。停卻明朝放溜船。閑房新聘紫雲娘。絲竹錚鏘置兩牀。塊壘年來銷已盡。白頭猶入少年場。吳雲燕月兩恩恩。別意方新酒正中。一曲當筵如一世。莫辭聽到六么終。

原作

汪沆

衣冠優孟醉模糊。從古神仙屬酒徒。竿木逢場聊作戲。童心還憶昔年無。

浣香樂句染香笛。不聽清歌近十年。今夕東堂競絲竹。爲渠怱悵罷觥船。
屏彎記曲有貞娘。合製箏牀共笛牀。我亦中年感哀樂。何妨陶寫百千場。
生憎催別苦恩恩。聚散無端一霎中。久識人生同爨演。銷魂不待管絃終。

蓮坡餞予竹間樓張燈看月得三絕句

燈映迴廊月上樓。交光特爲故人留。空庭荇藻浮沈影。襯出紅蓮竹外秋。
從來秋月最淒清。添得春燈豔更明。不是露蟲喧酒半。渾忘身在海津城。
今夜燈筵昨夜歌。歡悰無奈別愁何。明朝回首西津路。明月盈盈秋水多。

歸舟行衛河西顯先發一日中塗相遇知有武昌之行賦此送之

水宿懷前儔。荒雞已戒旦。乘流各參差。近岸屢迴轉。停橈復相逢。行計中道變。男兒且依劉。鄉井何足戀。
迺賤子所安。才謂子堪羨。江夏黃鶴樓。青山漢陽縣。太白句到及葉飛初。高吟獨不見。

獨流口

周世宗北征下三關由
此泝流而西事見通鑑

軍容無復汎龍舟。古樹荒烟過獨流。若使鎮州存佛乳。關南誰遣作邊頭。佛乳事見王
翬隨手雜錄

油坊梨

北果品最繁。堆盤媚南客。蒲桃僧眼青。蘋婆佛脣赤。棗皺撲滿筐。栗小剖盈石。此皆待露霜。急就未盡釋。

船過下油坊。燕齊接咫尺。沙村樹纍纍。梨熟號秋白。斜陽射林黃。登岸觀小摘。幽禽啄易損。芒蝸穿不惜。
芒蝸食果蟲也。見抱朴子。數錢致連顆。入手雙復隻。香清先破鼻。膚脆待冰噍。老夫苦肺氣。得此潤關鬲。篙師利販鬻。包裹動千百。區區釘坐須。關吏愁橫索。一笑聊朵頤。無勞遠懷核。

雨泊故城寄嶰谷半槎

不待迷途覺。昨非扁舟寥。落寸心違。孤城風雨秋更斷。千里關河旅夢飛。幸託良朋全遠志。莫教慈母寄當歸。平生浪說交游徧。更有何人重芟衣。

小泊阿城鎮戲成三首

瓜壺磊落菜登庖。七級牖名南浮到市梢。真偽世閒誰可辨。家家門外賣阿膠。
十六巫兒兩手摻。相攜女伴話話誦。生來阿縞何曾識。自翦秋燈吉貝衫。
麥熟還期歲有陳。踏榆過後事艱辛。舟中睡起渾無賴。說餅應須了了人。

望蜀山湖

秋在無情有思閒。扁舟輕載客愁還。心隨飛鷺行邊去。一點波心是蜀山。

仲家淺卽目

荒陂野水漫縱橫。一片斜暉柳外明。仲子祠前滴秋翠。鳧雲嶧雨晚來晴。

淮城使風暮抵揚州

西風作意送行舟。帆飽清淮碧玉流。三百里程消一日。蘆花吹雪到邗溝。

吳氏家藏十三銀鑿落歌爲蔚洲作

秋琴館裏秋窗拓。主人示我銀鑿落。一一數如琴上星。云是前朝季年作。先世留貽手澤存。石交介壽心盟託。文如絲髮鐫刻精。製比商周彝鼎各。歷時知更幾晦朔。請爲中金溯其略。神禹梁州陳土貢。銀與罍磬齊磊砢。先秦僅充器飾用。漢興三幣旋廢閣。朱提大侵赤仄權。唐始蠻鄉行漸博。承安實貨鑄卽成。金溪孝女冶曾躍。輕齋利共粟俱生。變化無端累杯杓。空傳白氏梅漿洗。白香山寄銀盃與裴侍郎詩云。重以鹽梅試洗看。自注。銀匠洗銀多。梅漿也。已笑韓公花葉鑠。韓昌黎寄崔立之詩。我有雙銀盃。其銀得朱提。黃金塗物象。雕鐫妙工倕。又云。野草花葉細。不辨葢葦蕩。況當千古必爭地。江左蒼黃事堪愕。史相壁壘未崩摧。高家兵馬先焚掠。此時鑿落何處藏。鬼護神訶免搜索。至今珍祕深且嚴。檀以香檀謹局鑰。二分不敢醉明月。十千那肯澆紅藥。莫教惡客髻中匿。豈使貪夫市上攫。因思古人銘彝器。子孫永寶宜虔恪。君今持己等持盈。沐浴詩書光燦若。爲君作歌歌思長。祖德看君更恢廓。

雨後同蔚洲登大觀樓望隔江山色作二首

一片闌外帆。帆外山藏雨。秋翠忽飛來。都染瓜洲樹。透迤青不斷。潤州入昇州。一重複一掩。不掩南渡羞。

秋日懷旭瞻

漸水指家林。秋風日夕深。無書非是忘。有夢卽相尋。野艇看山約。僧寮問字心。寥寥弦外意。餘子漫知音。

吳甌亭席上食哈密瓜分韻

儒生守環堵。封侯徒所羨。云何几席閒。伊州眼中見。伊州近燉煌。瓜美不容選。年年職貢餘。賜出馭娑殿。形長狐得藏。氣冷蠅早遣。阿誰轉相貽。及此賁文讎。漢家通西域。聲教被月窟。要知六師征。詎獨爲瓜戰。衰年安儉腹。登壘荷鉏倦。差傳辰日種。適市取攜便。并刀驚削壘。甘嚼潭月片。珍物匪分宜。躊躇不敢嚙。

送全謝山赴叢山書院山長

初寒官舫晚潮催。知是經師入越來。石簣雲深書庫滿。墨池風動講堂開。西山餓後推前輩。謂劉念壘先生東箭收將盡異才。我憶舊游何日再。爲尋屐齒尙蒼苔。

冬日重游大滌洞天得詩三首

筍輿歷歷數烟鬢。霜擲風篁遠近閒。二紀重來添白髮。九關依舊鎖青山。有丹可駐壺中景。無術能謀世上閑。卻笑范零開石匱。塵緣未斷便思還。

前身名在碧霄曾。十月探奇喜未冰。洞裏天低堪倚杵。崑中嵐暗盡篝燈。山書字合仙人識。風佩詩非俗子稱。尙憶當年腰腳健。赤城有約試飛騰。

尋真又過會仙橋。萬壑烟霞閉寂寥。谿確自鳴疑擣藥。松風不斷學吹簫。臭帑喚醒雲根夢。小兆來爲帝所朝。玉殿無塵漸零落。紫芝碑在歲時銷。山中無塵殿供玉皇像。猶元時構。今漸頽矣。有洪武十一年洞霄新規記。徐一夔文。俞和書。張昱篆額。古碑存者。唯此而已。

步餘杭溪上謁凌將軍廟吳淩統

茗源直下漱迴汀。古社依稀記舊經。共呂子明矜戰伐。與甘興霸作神靈。夜嘶寓馬山行雨。曉散祠鴉樹見星。欲覓遺苗何處是。草閒部伍尙名亭。縣有部伍亭。淩統少時部伍鄉兵于此。

題汪復園亭角尋詩圖三首

少日同馳翰墨場。卅年飛電誤流光。不論公瑾小一月。今看鬚眉各老蒼。

城北幽居一水通。荷香柳影冷吟中。分明畫出陳居士。亭角披披兩袖風。亭角尋詩滿袖風。陳簡齋句也。

老去酒兵元偶爾。新來眉斧不相宜。與君商略閑功課。長日唯消幾首詩。

潞琴行爲汪秀峯賦

高堂試解囊琴縛。梅花紋斷龍池薄。指爪拂觸鏗有聲。云是前朝潞王作。神廟之姪穆廟孫。滂衣租食稅

居中原。承平無事尙雅樂。桐枝斲就除哇繁。一朝劇盜秦川起。福藩兵死周藩水。流離不惜青珊瑚。攜琴

南向杭州止。忽驚帝座隕天狼。又見金陵有立王。擇長幸寬貶尉氏。無人更肯奉貞陽。史可法欲立潞王。不果。天兵

破竹長江渡。蒼黃寧免崑岡懼。面縛開門救一城。至今稱佛猶如故。杭人尙呼王爲潞佛。何處青燐泣野烟。人亡琴

在歲時遷。吾儕共飲申時酒。此地仍傳戊日弦。小篆銘文藏在腹。兼金得自街頭鬻。誰將舊事譜滄桑。彈出酸然不成曲。

寒柳

酸風無復一枝新。憔悴翻疑故態真。葉落紛紛汴隄雨。鴉棲瘦似灞橋人。不將濃影遮游舫。猶記斜飄拂舞塵。留得慶奴羅扇子。烟痕挽住舊時春。

題趙子固墨蘭 嶧谷所藏

廣陳之里幽人之居。窈然空林有香猗如。芳草無言春風太初。懿彼爨齋妙墨相於。其葉則勁其花則疎。芝連質秀石抱中虛。同心伊誰曰所南歟。鄭國服兮楚臣佩諸。

題女士畫扇三首 漁川所藏

名同班氏最清華。知道停雲是外家。點染春心冰雪裏。只消葉底兩三花。趙昭雙 鈎水仙
從來名士悅風流。小筆蕭疎在扇頭。一笠空亭行跡少。石城烟樹冶城秋。朱玉耶 疎 樹山亭
寥落江山發興新。疎松列翠指通津。閨中也自傷秋旅。寫出雙帆不見人。黃媛介 江 山秋帆

嶧谷半槎昆弟招游焦山取道霍家橋次竹町韻

問訊城南路。還同輞口尋。江天遠不極。雲日澹相侵。牛嬾仍眠甕。鴉寒後出林。重來水竹地。情話愜幽深。

夜宿南莊

平生苦愛竹與梅。西溪有約鉏蒼苔。我行北地少二友。衣塵滿罷空歸來。歸來復向韓江寓。出郭雲陰風色暮。招要羣屐南莊游。舊是梅多竹深處。疎林四面開茅堂。卜夜須卜子夜長。竹搖萬箇酒燈綠。梅放數花詩硯香。彷彿西溪十八里。月痕浮動追春始。江雨無端竹裏鳴。不教梅影橫窗紙。

焦山觀音岳晚望再用趙冰壺韻

手剔摩厓舊跡存。江風爲掃凍雲昏。山當落日如爭渡。帆向遙天欲倒吞。絕頂僧棲同怖鷓。空廬人去有驚猿。廿年三到緣非淺。好掬清波洗眼根。時予方病目

同作

馬曰璐

雲磴依稀屐齒存。茅亭登歷海光昏。音兼吳楚人重到。氣壓曹劉句早吞。萬里奔流浮落日。十年清景問栖猿。江山佳處歸長望。嘯倚天風坐石根。

焦山看月分得聲字

焦山寺裏鐘始鳴。焦山寺前江月生。此時月上潮復上。風水相薄爲奇聲。餘音瑟瑟獵枯荻。磔然飛起棲禽驚。長波萬里入杳靄。中流一道馳空明。數星莫辨北固火。幾點不送南徐更。羣峯隔岸悄如睡。何事賈舶貪宵行。吳頭楚尾兼越角。我輩聚若九子萍。同游者九人 珉石興來弔鶴瘞。瓊田望去呼龍耕。坐久起踏松

影碎滿地窳。窳窳霜華橫。琉璃宮殿水精域。佛界盡在寒而清。良明偉觀那易得。天教今夕二者并。高詠坡公赤壁句。一尊酌月還同傾。

同作分得月字

馬曰琯

十年不到浮玉山。夢裏時時幽興發。琴聲憶著冷侵肌。詩思尋來清入骨。天公從古妒佳游。未必重登還見月。今朝賈勇挂帆過。正值晴冬寒不冽。夜深雲淨五三星。浪湧潮翻逼銀闕。望處澄江徹底明。吟成遠岫排空沒。黃蘆苦竹舞平沙。驚起香林定巢鶴。同行有客氣最豪。把酒披裘坐巖窟。廣寒八萬四千戶。要與江山助奇突。人生此境豈常遭。拾得莫教隨手撇。經窗且復嗅梅花。海風吹我蕭蕭髮。

登雙峯閣分得翠字

香閣如危巢。細路盤折至。頗覺筋力衰。不辨舊題字。爐烟浮江光。帆影移竹翠。此閒坐永日。自爾絕人事。將爲禽尚游。未免周何累。歸歟復褰回。短策耐寒吹。

同作分得山字

杭世駿

凌虛結遐覽。一菴翠微閒。石磴穿鳥道。瘦策同躋攀。了了脩眉卷。遂見江南山。喧濤鳥下過。白雲窗中還。清景迫短晷。後游恐綠慳。霜鐘發深省。鐫銘留屏顏。

焦山歸宿南莊二首

江山奇絕足盤桓。歸向梅花說夜寒。一片水精菴外月。隨人小倚曲闌干。
多少長安車馬塵。故園空鎖一園春。板橋修竹風燈裏。始覺林亭有主人。

洪曲溪延清齋雅集分題得炙硯爐

一夜陶泓有凍泉。故教移置煖爐邊。清霜古怨辭宮瓦。茅屋春風夢石田。
勛策華林非躍冶。句回枯木不離禪。先生笑著寒齋譜。休比矮桑磨欲穿。

開平王孫種菜歌并序

常延齡字喬若號蒼谷。開平王遇春十二世孫。襲封懷遠侯。官南京錦衣衛指揮使。有賢行。曾疏劾馬阮。鼎革後。與夫人徐氏。中山上公之愛女。種菜於金陵湖墅。裔孫執桓乞詩。

高皇初定江南日。采石磯頭功第一。橫行十萬常將軍。帶礪河山永無失。
滄桑抱節有賢孫。鍾阜秋青入淚痕。飄零大樹不復見。顛顛故侯安足論。中山同志深閨婦。曲折天吳移舊繡。
誰知偕隱灌園人。俱爲異姓分茅後。幾稜荒畦非賜田。晚菘早韭資寒泉。可憐一紙鋤姦疏。卻裹長街賣菜錢。
歸來偃仰棲衡宇。猶勝貂蟬與阜伍。鳳臺園裏鬼迷花。雞鳴廟前狐嘯雨。漫向金陵弔夕曛。百年寂寂但孤墳。
籬邊尙發東風菜。一任空原野火焚。

張漁川春草堂雅集同賦盆梅

船唇欲發未發。梅意全舒半舒。但覺室中香滿。不知池上冰初。斜枝馬遠結法。瘦格章泉課餘。歸去西湖千樹。爲君落月踟躕。是夕予歸杭

次韻答吳葦村見懷

年來善病已衰微。無寸長如薙髮僧。多謝良朋遠相念。試吟佳句恐難勝。雲閒雁迴何人弋。冰下蛟寒未可罾。觸撥孤懷當永夜。爲君挑盡一窗燈。

奉懷樊榭先生

溪南吳鳳華 蔚洲

脫屣浮榮懶就徵。前身應是寫經僧。瘦如飯顆吟尤苦。清似冰壺冷不勝。行繞梅花隨鶴跡。坐看山影落魚罾。相思風雪湖陰路。定對攤書竹屋燈。

立春前一日作

殘年不出戶。試起繞階行。上番梅開色。斜陽雪滴聲。春回偏耐冷。臘去有餘清。辛苦西川戍。兜零事遠征。十二月二十五日。同穆門。甌亭。汎舟至聖因寺。訪大恆上人。用東坡臘月游孤山。訪惠勤惠思二

僧韻

閒何闊。高士湖。孫太初號西湖爲高士湖歲云暮矣。一事無。出郭見山已如笑。登舟招鶴若可呼。興來奚暇謀諸孛。白頭相覓塵外娛。延緣到寺不十里。愛此水曲兼林紆。沈沈千柱釋子廬。阿師晏坐秀且孤。清修凜凜對雪

竹妙句往往傳風蒲。出家洵是大丈夫。徑山欽禪師語繩牀茶話午至晡。復從絕頂望烟景。洪谷有手應難圖。幾點綠萼破凍餘。繞樹願爲蜨翅遽。拏音同訪鄰翁。逋暗香疎影休重摹。

孤山探梅用東坡松風亭下梅花盛開韻

扁舟喚渡尋西村。董嗣果西湖百詠注云。西林橋爲古西村喚渡處。殘梅零落誰招魂。水邊尙有數枝在。三花兩葉苔斑昏。高吟

爲拜處士墓。舊游只認孤山園。江南春事亦太早。石闌坐覺生微溫。空亭遠照一峯雪。花鬚落日如初暎。

平湖鱗鱗峭風起。城頭吹角愁關門。作詩清絕洗綺障。舉似老宿知忘言。探芳寄語後來者。明朝尙及攜匏尊。

歲除日同江聲東壁甌亭游紫陽菴

趁閑同過羽人居。怪石玲瓏玉不如。江影一窗開洞壑。松聲滿耳接空虛。鐘鳴塵界知春換。碁罷仙家忘歲除。我已行年何子季。比來百念轉蕭疎。南史。何子季云。吾年五十有七月。食四斗米不盡。何容復有宦情。子年正與之同也。

元日試筆以下已已

手搔短鬢感流年。起向東方未白前。後飲酒巡頰。杜舉少成文字笑。唐捐壽親無量須。依佛老母今年八十貧我何私莫問天。跬步出門春浩蕩。好詩都在柳梅邊。

北郭歸舟卽事二首同江聲作

沙尾痕漸沒。芹芽已可挑。不見青山郭。舟行雨瀟瀟。似出新林浦。逶迤向板橋。同舟得我友。笑語烟際落。人家閉暮色。燈影穿叢薄。歸路喜非遙。漫畏東風作。

春餅

新年今夕好。入手愛團圓。筍底禁風卷。燈前嘆字看。園丁供生菜。竈妾飭春盤。不道來牟貴。偏宜老齒殘。
近時麥價之昂。前此未有。

元夕大雪。集汪秀峯真硯齋看燈分韻。

落落城中幾弟兄。春宵又作放歌行。殘梅亭角燈初上。飛絮牆腰月自明。甲子晴慳多望歲。是日爲春甲子鬼方天遠佇休兵。老夫把酒殷勤祝。到處豐年有笑聲。

春雪初霽。同穆門護林恆公汎湖得岫字。

湖上四時佳。最佳早春候。況逢晴雪初。招要詎容逗。天公喚滕神。巧在阿香後。十四夜雷。十五夜雪。風力峭能留。陽光消不驟。故作冷淡觀。少緩芳菲鬪。花房鸚破觜。柳色鵝脫殼。幻玉刻樓臺。溼粉皴林岫。中央開壁鏡。西子妝更秀。心爲尤物移。短句詠難就。非因侵曉來。安得此邂逅。

口占待得詩成雪已消足成一律

待得詩成雪已消。滿湖新水動蘭橈。夕陽紅送僧歸寺。山色青隨客度橋。一笑閑名花市酒。百年樂意竹

房簾繁華說盡前朝事。分付高枝鳥語嬌。

春雨齋居遣興

枯坐空齋聽雨聲。春來景物似淒清。苔緣古砌多幽思。草長閑門不世情。尚子卦中知損益。昭文琴外悟虧成。蕭然止足身無事。驃騎寧高第五名。

春分後三月初晴。雪軒招同穆門蘭垞董浦汎湖分韻。

載酒邀朋有范雲。四山嵐影坐閒分。放懷且喜同鷗侶。洗琰何煩對馬軍。樂過中年天所借。晴無三日常來聞。天桃正照清波影。好揀繁枝插帽簷。

董浦招同諸公鳳凰山看桃花作

春情垂老春醅濃。又被城南花惱公。青山無賴澹紅粉。小雨野鶯啼故宮。看花人去愁難寄。一笛花前何限淚。來訪西天寺裏鐘。碧蘚蝕殘蒙古字。乙丑三月六日。顧丈月田招看花于此。鵲詠烏龍古廟中。今下世已五年。爲之泫然。廟有元四天元興寺鐘一口。上有江浙行

省平章達識帖睦瀨題字。并蒙古字經。

穆門招同諸公汎舟甘村看花分韻二首。

出郭烟光暖。攜尊客意和。花深隨水曲。舟緩得春多。紅外山連屋。青邊竹映坡。何須話前度。不厭屢經過。並岸尋村徑。游從興不孤。繁枝側帽避。落片倩風扶。美景難爲別。時柳漁將入都村農也自娛。主人稱老健。傾倒

玉雙壺。

大園上人惠紫菜補陀茶。用山谷集中食筍韻。

平生嗜讀書。枵腹但貯菜。勞勞求益心。屢問市兒賣。上人空味塵。不羨萬羊宰。挂席割海雲。衣色共難壞。歸來包倭紙。償我清淨債。香山供高禪。詩中費薑芥。取用及齋盂。毋乃已傷介。雷鳴候石鼎。雋永堪一嘍。伴以梅岑春。松濤洗餘噀。景純賦已收。鴻漸經未采。紫菜見郭璞江賦。

二月十五夜。泛月三潭。同穆門柳漁竹田恆公作。

三潭人靜煙沖融。茲游奇絕我輩同。千金不買湖月白。一杯獨吸春山空。柳邊花外有今夕。銀燭清歌無此風。贊公房裏續前夢。黃雞莫漫啼恩慙。

晚入靈隱寺。次日吳君甌亭來。遂同穆門竹田入山柳漁歸去。

遂果西山諾。來尋猿鳥羣。斜陽隱春樹。梵唱出香雲。佛坐莓巖徧。人行乳洞分。如何憇寂地。衆籟一時聞。坐月冷泉亭。贈巨公。

經年不入山。山月喜幽詣。遂隨芒履行。出沒峯嶺際。清光倒泉心。瑣碎見松桂。一輪澄孤圓。倚闌勝仰睇。夜深春氣和。微風扇明霽。龍宮疎鐘斷。澗響續迢遞。林僧愛迎客。茶甌暗芳細。何處雜花開。石路杖頻曳。寒食湖上冶春絕句七首。

三日湖山爛漫游。汀花沙鳥爲句留。今年寒食閑蹤跡。半在僧坊半酒樓。
清繞橋迴澗壑長。春淙亭下踏春陽。越溪一尺西家髻。壓倒吳中時世妝。
猛雨豪風不奈何。誰教龍忌得晴多。桃花薄命成僥倖。腸斷佳人愛愛歌。
頭白周郎發興真。門吳家樂府劇清新。亭肩吾詩句神仙裔。田盡與西湖判斷春。
山滿樓空鸞浴翎。行窩大好在湖亭。凭闌斜日不歸去。吟盡浮嵐潑眼青。山滿樓明高深甫別業在跨虹橋東今廢
新寺海棠烘臉霞。兩株合得好詩誇。老夫朝暮看不足。一任人嘲命屬花。
踏花鹿女茜帶低。二月蘇隄似大隄。只有道人清淨眼。觀心久作絮霑泥。謂恆公

題穆門虎工中秋夜汎詩畫卷三首

畫爲華秋岳筆

抹月批風老更狂。殢人燈火是山塘。吳中勝事君知否。寫在周家十一章。
老我吳船易感秋。秋燈秋月幾曾游。夜來多少行雲影。不夢閩江夢虎工。
如此中秋天下無。船船銀燭度歌珠。風林煙塔迷離處。除卻倪迂那解圖。

寄沈椒園觀察萊州

河畔相逢跡未遙。使車聞又出中朝。戶盈左海齊三服。政洽東隅漢六條。瘦格幾回憑落月。高吟何處託歸潮。故人依舊耕漁侶。時望音書問寂寥。

次韻奉答樊樹見寄

仁和沈廷芳椒園

卅歲相思碧海遙。先生南返我辭朝。夢回梁月聞雞唱。香滿湖花發藕條。貧裏預籌游岳屐。老來縱筆浙江潮。耦耕行踐秋蘿約。無盡意齋吟沆寥。

舟過橫里懷平松兩先生故居并序

平顯字仲微。杭州人。洪武中官廣西藤縣令。謫戍滇南。沐國公英延爲西席。故居在北關外之橫里。地有仲墅。洛山水名十二里漾。松雨軒集中有句云。萬頃水雲橫里北。百年正隴洛山陽。又云。藕花官漾十二里。桑蔭鄰村數百家。又云。水竹空思仲墅村。至今過之風景宛然。惜乎先生之不能終老于是也。

出門天宇晴。暖風吹我衣。片帆一何駛。沙燕相隨飛。不斷故鄉山。新綠初生肥。謝村已回首。仲墅望依依。寬漾十二里。中有詩人扉。幽棲如此少。遠戍竟爾違。桑陰看浴蠶。草舍聞呼豨。當從田父飲。莫歎季女飢。

雨中過鶯脰湖

釣徒何處訪元真。來往江湖浪跡頻。青草綠波如送客。斜風細雨欲留春。

冶坊浜與竹田別

曉別一聲啼鴉。春愁幾處人家。記取綠陰流水。石楠似雪初花。

賦得未到曉鐘猶是春

韓江雅集

春歸何處更相留。且酌餘花藥玉舟。明燭心還惜芳夜。曉鐘聲莫動離愁。低回元相驚獨句。停待景陽梳。髻樓漫道千金酬一刻。千金多恐未能酬。

聽嶰谷半查談泰山之勝

天孫迴出名山羣。奇游歷歷今始聞。紅塵遠謝日下客。白石高揖雲中君。古來禽尙幾人共。雨後秦吳一髮分。老我曾吟望岱句。胸中空翠猶氤氳。

題張漁川所藏周昉宮姬調琴圖

天寶宮中尙歌舞。三郎天縱工羯鼓。廣平留下朋肯聲。寧王抄得龜茲譜。小部箏琶競追逐。雅樂當時棄如土。趙州長史用意良。貌出嬌嬈素琴撫。淡妝相對花下聽。低鬟背面尤娉婷。一時何處有三粲。霧閣雲窗深杳冥。關雎本是房中曲。不比等閑操汎祝。好將解穢謝君王。願君解慍四海康。

雨中汎舟過篠園三首

三日邗溝雨。能添打槳聲。紅荷如欲語。白鳥故相迎。水亭布硯席。初蟬流碧樹。菰蘆積無邊。不辨來時路。微雨或時作。鄉心何處消。垂楊拍新漲。煙艇第三橋。

夏日田園雜興韓江雅集

綠陰門外亂鳴蜩。畏景偏於此地消。秧動風畦初足雨。荷翻露港慢通潮。聲高與客聽芸鼓。味苦呼童種酒瓢。無事牽牛著涼處。輒紅十丈自然遙。

立秋日作和陳授衣

春殘一舸到揚州。歲序無端已半周。安隱鉢單僧過夏。蕭條風雨客迎秋。病餘稱藥煩賢主。伏後嘗瓜憶故丘。柳巷南頭詩老在。全家住久尙鄉愁。授衣杭人家。揚州之柳巷。

哭查蓮坡

燕南耆舊久相推。會面俄成萬古哀。漫浪虛充選人去。淹留直爲訪君來。序去年事。乾坤劉尹誰知我。湖海陳登未易才。老淚臨風何處寄。手書猶在忍重開。蓮坡于歿之前八日。猶以手書遠寄。未幾而凶問隨至矣。哀哉。

蕭照中與瑞應圖曹助贊并書。明吾杭陳瓠菴故物。今在廣陵吳氏。

趙家九葉承平業。乾坤初換紅羊劫。變興哀痛塵再蒙。自此中原滿兵甲。肅王已去康王留。神人助順先磁州。卽真當念衣中詔。避敵翻爲海上遊。艱難百戰英雄死。小朝廷在臨安矣。迎得慈寧阿母歸。不負黃羅卜。棊子太平功。就稱翁翁。紹興間。禁中呼秦檜爲太平翁翁。見寶退錄。西湖歌舞驕春風。倦勤竟受天下養。瑞應圖呈德壽宮。蕭郎曾畫延祥壁。蕭照奉勅畫四聖延祥殿壁。見四朝聞見錄。六百年來撫真蹟。中間李固渡頭冰。彷彿扶持光武厄。臣勛書贊官職俱。北狩見聞非貢諛。曹助有北狩見聞錄。何如元叟活溪頌。漫比簡子常山符。

魏景初帳構銅歌狀圓如筒徑一寸長四寸許中空而底方旁出歧枝有孔上有字云景初元年五月十日中尙方造長一丈廣六尺澤漆平坐帳上廣構銅重二斤十兩凡三

十二字八分書邗上方西疇所藏

霸城月照仙人淚不逐魏宮翁仲二銅駝久作劫灰飛帳構猶存景初字洛靈兒愛芳林好奪得蛾眉供灑掃弼瓊想像薄羅風傳與千年尙方造流蘇翠羽光零亂土上出金妖讖換見王子年拾遺記文成石馬大討曹水吐玉蝾纒效漢碧筩平坐朱竿密八分應認仲將筆魏明帝宮館寶器皆章仲將書見太平廣記摩挲彷彿陵雲臺小縮波痕勁無匹更聞昭烈能自貶御用都歸銷銘南史崔祖思傳劉備取帳構銅錢一枚古色出重緘以充國用帳構銅之名僅見于此留向人閒鑑奢儉

秋懷

落魄江湖鬢有華秋風又入小窗紗無官張祜詩名賤多病休文藥力賒慈母老年忻善飯阿宜弱冠解塗鴉新來只有團圓想猶及中秋可到家

次韻張嘯齋同舟渡江之作

依依老柳拂汀洲我賦將歸君始游風月西湖如有待烟波東道若爲謀烏絲剡紙蠶頭字白紵吳歌鴨鶩舟自是高人情調逸笛聲吹過一江秋

同嘯齋西疇暮游惠山至泉上

落帆楊柳灣。暮色黯已動。信步入幽翠。山影正如夢。重來非昔儔。光景不可控。沈沈泉涵甃。漠漠雲栖棟。崑桂何處開。妙香時一送。不逢片月生。風弦爲誰弄。

惠山下與西疇別

人生客路惜離羣。笑語連朝得共君。須記並船分袂處。僧鐘茶火隔秋雲。

哭周穆門

如君行誼友兼師。一慟秋風草木衰。徵士東岡有周變。稱兄南國只袁絲。尊鱸不返松江櫂。山水空留汐社期。儂指交情三十載。九原無路說相思。

大理石屏歌徐陶尊索賦

石屏二。一爲山高月小。一爲水落石出。蓋天成景也。

坡公會賦後赤壁。妙語排空江月白。多年無人更收拾。幻入點蒼山下石。公之遠遊唯儋耳。異域未踰大渡水。山靈豈亦愛公語。不似紛紛舒與李。徐公清溪結草堂。尊公象求少尹琢屏雙插堂中央。有時高枕臥其下。夢作孤鶴橫江翔。前身恍忽居臨臯。絕境高唱爭清豪。五郎押韻斜川曹。陶尊行五寒光一點襲吟袍。巖巖欲踏三山鼇。雅勝巫峽翻雲濤。不用抱遺撰志金粟詠。元松陵謝氏有巫峽雲濤石屏楊廉夫爲作志顧仲瑛爲作詩我爲長歌聊賀茲石遭。

題陶尊綠杉野屋圖

手種絲杉百本餘。舍亭山下閉門居。南州高節渾相似。北路風流笑不如。清籟含霜朝几靜。翠幃承月夜窗虛。主人只恐棲難穩。早晚讐書向石渠。

九日送西顯之武昌二首

今日一樽酒。壯君行色無。登高何地是。送遠更心孤。樊口波濤落。怡亭木葉枯。應添感秋句。重疊付奚奴。明時身不試。軍府惜蹉跎。月尙南樓好。人逢上客過。飛牋流翠墨。開讌倒金荷。應念衡門下。西風獨養疴。

初冬命園丁修剪花木有作

平生只合閉門居。寒事于今亦有初。荒穢頓芟聊復爾。芳菲可待且姑徐。斷苔預爲移梅地。掃葉堪充煮茗儲。老去庾郎最蕭瑟。小園賦就欲何如。

朱母陸氏旌節卷

青燈絡緯動悲吟。撫襯提孩兩不禁。鄰火滅時飢火忍。烏頭全是表冰心。

全謝山喜飲苦酒詩以嘲之

大戶飲嗜辛。小戶甘是取。君戶大小閒。奈何好飲苦。前身天酒星。匏瓜乃爲輔。生成東野腸。孟郊詩。食齊腸亦苦。百觚堪一賭。剉槩供釀材。咀荅付麴部。說文大苦荅也。醉中不攢眉。起作鴟鴞舞。其味盡入心。驅向筆端吐。詩苦與俗違。文苦致身窶。五行性有偏。惡旨詎勞禹。祇應獨酌謠。添入寶華譜。

月夜

乍霽初冬月。團團出女牆。明收一旬雨。清釀五更霜。入竹禽驚夢。侵莎蟄閉房。今年餘兩度。深惜此流光。

同葦浦謝山北郭閑汎

人生難得是冬晴。隨意河橋撥棹聲。縱不成游偏有伴。偶然欲出豈無名。因看黃葉商行止。爲愛青山當送迎。歸去只愁僧舍客。把詩吟向佛燈清。謝山時寓僧舍。

南潯田烈女詩

儂住潯溪上。郎家共里閩。掌珠祥入夢。冠玉弱知名。半面期幽壤。雙飛誓隔生。朱絲曾約髻。畢命託精誠。長至前一日。得沈椒園萊州書。并惠氈段阿膠。卽次去年嶧縣舟次見贈韻。奉答二首。

髻奴書到一陽時。千里冰霜接夢思。宦況知君清似水。窮愁泥我亂如絲。冬堂贈疾煩村覘。曉寺安禪禮導師。只此便應爲近狀。疎蕪筆硯報章遲。

山林鍾鼎不同時。誰爲殷勤繫遠思。海內朋交存臭味。卷中詩句叶金絲。井膠舊在酈家注。毛布曾傳孔氏師。阿膠見水經注。孔傳織皮毛布。肺氣寒天須底物。感深不道寄來遲。

雨中過安隱寺寄吳甌亭

寒雨跼篷底。經過古道場。雲連山懵懂。松罨殿荒涼。舊酌名泉冷。追思去日忙。何當約雙屐。重與試旗槍。

同張龍威訪陸南香北墅

北墅幽棲處，閑尋野鳥知。風廊行落葉，烟閣俯空池。官罷天教逸，詩成客詫奇。此中多樂地，漫白幾莖絲。

集南香齋觀窗上樹影聯句

日晷近西南，照此窗上樹。鷓鴣同心集二三，斗室坐和煦。陸震光疎枝幻自交，虛樞晃如赴。陸錫周斜看鳥漸移，空想雀難駐。張元叔濃淡染匪真，動搖畫亦誤。鷓鴣借問何因緣，兼以寒飈故。陸培南香

題馮績困無波艇

規制分明六扇篷，窗開鑿設小闌紅。長依茶竈筆牀畔，時泊疎花瘦石中。大地四游俱在水，人間萬斛那禁風。爭如安穩家園樂，只把詩筒當釣筒。

奉答當湖吟社諸君折梅贈行之作

客身似葉東湖濱，北風十日吹倒人。明窗深爐作詩供，一枝烘蠟爭鮮新。歲寒之交味禪悅，贈我幽香媚冰雪。諸公送者自崖返，相對篷籠如未別。

送樊榭先生載梅歸杭

鮑詢

先生興欲乘歸帆，寒宵共聚深杯銜。殷勤何物可爲贈，花字磬口春風絨。春風未轉交三九，月落篷窗香在手。西溪別有雪千林，一枝還肯寄儂否。

同丁龍泓過潮鳴寺訪大園上人觀戴進畫功德諸像立軸殘本

城東結游侶。殘臘得清暇。忻茲後梁寺。復駐南宋駕。冰釋魚尾莘。林疎烏鳴沙。菜甲畦稜斜。山影屋頭亞。旁闢白竹扉。中啓赤華舍。上人此安禪。苔榻句無價。雨深苔到榻糧欠語及戴畫蹟。塵網解包乍。迎文失莊嚴。天女尙姪姪。冠花凹凸裂。衣葉披翻罅。散脂藥叉徒。戈鋌儼欲下。又寫屍陀林。枯骼瘦堪怕。圓勁意猶存。精彩炯相射。當時修門召。書院定雄霸。贈詩雖有楊。士奇被放無奈謝。廷循人往三百年。一藝妒堪咤。冥搜作佛事。舊觀隨元化。聊爲柯古述。歸翦寒燈夜。

冬日同雲亭江聲甌亭竹田集吳山延慶道院分韻

丹房重到路依稀。共倚闌干客思微。半郭樓臺橫杳靄。一湖林岫入烟霏。天將雪意供詩本。梅送寒香上道衣。安得憑虛吹鐵笛。坐看人世玉塵飛。

樊榭山房續集卷第八

詩辛

新正三日同東壁甌亭竹田集吳山延慶道院分韻

以下庚午

始春事登臨。麗矚與前別。窈窕開巖檻。自擅山水窟。一鏡瞰澄明。千峯俯環列。浮嵐氳欲動。遲暉耿難滅。馳心爲輕舟。孤嶼轉沿越。乃知仙家事。靈境坐超忽。茗餘幽鳥哢。吟次閑梅發。相要問黃窻。予將鍊華髮。

早春同人集讓公南屏山房分韻

空山春事早。幽思集虛樞。梅萼分湖綠。茶煙出竹青。林暄宜曬衲。石潤罷翻經。愛接支纖語。真忘物外形。

新晴探梅南屏山中同江聲龍泓讓公作

爲問梅花信。高僧領客探。笛聲吹不到。鳥語靜相參。春竹孤香抱。晴湖一碧涵。翻思前夜雪。無路向山南。

題華秋岳浴鵝圖

曇礪村中我舊過。噴船無力困滄波。近來頗厭書生幻。不愛籠鵝愛浴鵝。

題友人北墅耕讀圖

人生良計無如耕。子真谷口垂高名。人生至樂無如讀。莊叟曾云學爲福。好學爲福。出逸莊子。從來二事合并難。耕

兮求富讀求官。何如九年之耕十年讀。悅心果腹相盤桓。君家歸錦橋西住。北墅連延夾城路。白蕩波通柳外村。秦亭翠見煙中樹。頗聞卜宅先誅茅。買田繞屋書成巢。自資地利鄙惺鞅。每探古義窮媧庖。文度佳兒美無匹。膝下承歡堪永日。閑將耕讀作貽謀。輟耒荒經俱有失。幾時汎艇過幽居。擬趁紅荷銷夏初。瓜瓞菱港經行徧。蠶書蟹略鈔謄餘。吟聲未斷農歌起。恍忽置身圖畫裏。比鄰近喜有同心。我詩請示茨簷子。

過南華堂追悼谷林

故人不見已三年。重到池亭更惘然。悵望殘梅點殘雪。空餘新柳舞新煙。塵凝石畔藏書庫。雨損隄邊送酒船。何處風流未消歇。幽禽留客語清圓。

金江聲吳山志成詩以落之

窮塞馳驅返故林。煙霞興在老逾深。埽除問舍求田計。校檢模山範水心。強至里中添故事。宋強至吳山里人。君居同之。伍胥廟下續新吟。春來雨阻同登約。手把青編子細尋。

爲堇浦悼亡姬

知君急淚制無因。客舍驚聞玉化塵。夢斷畫簾微有雨。歸來錦瑟但如人。碧桃落盡空留子。白髮生多最苦春。想到金臺定情夜。殘燈向壁喚眞眞。

二月十五日。同人展周兄穆門墓于湖上之青芝塢。用皮襲美過張承吉處士丹陽故居韻。

何方清佩逐飛霞。埋玉空山重可嗟。墓下驢鳴猶有客。松陰鶴返定思家。百年大雅存吟草。二月東風滴酒花。猛憶去春同夜汎。短篷曾繫水西涯。去年此夕同汎。月三潭各有詩。

汎湖歸舟遇雨用前韻

陰晴無定驗朝霞。零落還因故友嗟。社燕來時初上冢。林鳩啼處各歸家。山容正媚偏逢雨。酒價初高只爲花。老向太平行樂地。一枝柔櫓是生涯。

寄吳鳴臯

同岑渺天末。夢去春芳歇。江通瓜步雲。樹隔蕪城月。之子神何清。相望空復情。二十擬文賦。半千期令名。媵修寧有已。餐勝方今始。三歎北游詩。不負琅玕紙。

次韻奉酬樊榭先生

溪南吳鳳翔鳴臯

幽澗鳴春泉。冷音殊未歇。忽枉瑤華篇。若對松際月。月明風復清。鶴望含遙情。塵尾不輟講。釣竿難避名。雲山莽未已。攀陟何時始。吟成且寄懷。自寫松花紙。

同江聲東壁甌亭登吳山西爽閣

樓倚吳山好。新晴一笑佳。春湖留遠眺。名岳貯奇懷。日隱雙峯晦。風喧萬樹霾。呼童掃苔石。題字記曾偕。

西爽閣聽施鍊師彈石上流泉

天風吹春沙。眯目阻遙望。道人山下返。如鶴息青嶂。手拂落霞琴。爲我譜幽貺。一彈初滴瀝。再彈復跳盪。淙潺七條水。直瀉磐石上。中閒嗚咽處。微有松聲颺。近疑雙瀾流。遠接三峽浪。滌塵耳更清。破睡神覺王。從今雅弄名。不數柳文暢。

趙氏西池看海棠同施自勗作三絕句

花中戚里此稱奇。淑態穠姿想見之。莫笑杜陵窮相眼。麗人行卽海棠詩。正潘牡丹榮等志以海棠爲花戚里。

亦復奇顛擬放翁。名園可惜鎖東風。與君臨水偷看處。定愛深紅愛淺紅。白頭那更有風情。燃斷吟髭太瘦生。何意一枝禪榻畔。宿妝殘醉伴清明。

陋巷

陋巷無來往。深棲幾歲華。犬能憎俗客。燕肯戀貧家。遣日書從借。經春樂尙賒。曉風偏解事。吹放一林花。

大風

已惜花將盡。飄風似少恩。兼聞屋瓦振。直使釣船翻。病骨應難敵。春愁孰與論。微明聲稍止。墮雀尙餘喧。

城曲

城曲村非遠。春深草正薰。池萍生穀雨。牆竹翳桑雲。鳥散齋鐘罷。風來戲鼓聞。地偏神貺古。童稚亦欣欣。

吳長公自梁溪移家來杭。用沈陶菴題石田有竹莊韻奉簡。

高人雅愛城東住。與我棲遲共一川。相望無多春樹外。經過只隔野橋邊。栽花更闢三三徑。煮茗休尋二二泉。爲話越游吟興在。涼秋重泛鏡湖烟。鶴林玉露。周益公訪楊誠齋于南溪詩云。回環自闢三三徑。尤名之曰二二泉。泉蓋在梁溪也。

晚春感興

水外茅檐竹裏扉。閑窗人靜試單衣。壓枝梅子多難數。帖地楊花弱更飛。白日如年娛我老。綠陰似水送春歸。如何尙著齋鹽累。又理雲帆別舊磯。

題新市映碧亭

白魚買就午炊遲。映碧亭前小泊時。閑卻東風一溪水。惜無人解弄漣漪。

璉市

東去含山遠。西來盡水鄉。藤穿橋腳古。溪繞市心長。白髮逢挑筍。青裙出采桑。人家濃綠裏。應笑客舟忙。

晚次陵口

齊梁陵墓所在

綠徧千村叫杜鵑。餘寒猶未脫吳絛。暮雲青草夾岡隩。春水小風陵口船。舊事六朝殘夢外。客程十載夜燈前。白頭不奈閑愁攪。擬向空門問老禪。

題文待詔石湖詩畫卷二首同嶰谷半查作

吳中佳處我曾知。十里青山塔一枝。潑眼湖光飛鷺外。無聲寫出范村詩。

桂花香裏此夷猶。細雨平橋負好秋。瞥見停雲小平遠。依然還我舊扁舟。丁卯秋過石湖。欲作一詩未果。

茅司徒廟迎送神辭并序

廣陵蜀岡平山堂畔。有茅司徒廟。相傳神五人。茅許蔣祝吳其姓也。茅名勝。異姓約爲兄弟。過谿旁。見一嫗共母事之。嫗爲虎食。五人奮力殺虎。地自是絕虎患。子案南史。梁王琳爲陳將吳明徹所殺。故吏朱瑒等請於陳徐陵。還其首葬八公山側。尋有揚州茅智勝等五人。密送喪柩達于鄴。通鑑。揚州作壽陽。是時以壽陽爲揚州也。琳舉兵平侯景。遭時多故。開關異國。欲以存梁。而卒死于戰。五人非親故。能送其喪柩還齊。誠義士哉。當時江淮閒。思而祀之。隋封司徒廣陵之廟。最著者。以宋紹定中。有陰殲李全功也。母嫗事近不經。驅虎之說。或有之。韓江雅集。同人爲迎送神辭。分得此題。因爲辨證如左。使事神者有考焉。

絢弦兮鼓籠銅。飛雨兮江岫東。戈彗野兮旗燄空。神之從兮建寧公。青林兮望篝火。於菟兮弭道左。八公山側兮三臺下。雲車未來兮我心苦。

斗野平兮烟霧羃。佇連蜷兮夜吹笛。殪新塘兮銳頭兒。回風颯兮降毅姿。福我氓兮大有。曷報之兮昔酒。神醉止兮歸無方。淮月升兮明古柳。

賦得滿天梅雨是蘇州送梅泝自京師歸里

濃陰風雨溼模糊。五月抽帆返舊吳。驛路三千行已到。畫橋四百望如無。涼生白紵虎丘寺。響入綠蓑鷺。脰湖此景較量燕地少。不妨賀鑄老菰蘆。

哭汪祓江

自失蕪城友。於君計已三。謂余腹白。程松門先歿。論交存重諾。經世付空談。衰白公榮酒。悲黃成式函。寂寥那可見。

揮淚滿江潭。

京口聞蟬五月二十六日

兩月鄉心不自聊。雨絲初歇早乘潮。一聲知了來何處。正在詩人丁卯橋。

六月二十二日。雲亭明府。招同鹿田江聲諸君。集復園分韻。

鬱鬱連朝不可任。得來池館洗煩襟。隔城山雨到荷葉。度檻野蟬嘶柳陰。早瘧已隨紈扇滅。晚涼應共茗杯深。清風攜自蘭亭長。只有閑鷗識此心。

秋暑同陸紆齋。張龍威。葉迎坡。孫刻畧。集讓公南屏山房分韻。

八月生衣未放閑。城中無處散疎頑。同來此地真消暑。自笑多時不入山。佛坐苔龕疑雨過。僧歸竹戶倩風關。扁舟載得涼多少。更與秋荷約往還。

九日望亭舟中

辛苦陰霖歇。蒼茫野色秋。百年渾作客。九日又扁舟。多病黃花避。長歌白鳥留。從來望亭驛。烟樹迴含愁。

大風渡江望金山

風雨翦江去。漁帆恐不禁。濤聲俄上下。山勢若浮沈。金碧疑神力。虛空見佛心。回頭驚定處。畫裏記登臨。

入瓜州城愛其多水竹之趣忻然成詠

收港蘆分界。城隅進艇初。平生苦行旅。隨地愛幽居。潮水侵籬滿。江雲入竹疎。誰家開草閣。借我著叢書。

次韻答吳梅查見寄

水國初寒雁叫霜。詩來便是接清光。五塘野色歸秋卷。千里離情寄夜航。淮海風流君未老。湖山隱興我偏長。若爲更約林中侶。謂葦村兄弟缸面同傾話草堂。

奉懷樊榭先生

溪南吳均梅查

山葉丹黃乍染霜。高棲遙憶對湖光。興來納翠開虛牖。病起探梅上野航。曾把新詩冰雪淨。爲尋幽夢水雲長。何時得挂輕帆去。問字閑過舊草堂。

臘月十一日同人集堇浦桂堂爲恆公四十壽。時恆公住持上天竺寺是日爲堇浦作山水小幅

西池雪後漸春融。香飯初炊祝遠公。乳竇雲堂新法席。竹針麻線舊家風。畫分山色來湖上。杖帶泉聲入

座中知有大千歸掌握。長年應與辨才同。

庚午除夕

散材寂寞又逢春。六十明朝是幸人。猶子纍完尙平願。餘年喜作老萊身。薄雲淡日商量雪。翠栢黃梅點綴貧。夜半無眠聽爆竹。詩情除舊要從新。

元日對雪

以下
辛未

閉戶焚香宴坐中。舊寒著意戀東風。無人可造真閑日。有雪相娛此老翁。竹色低迷三徑白。松明張王一爐紅。朝來凍筆呵初試。學寫宜春帖未工。

同江聲可堂龍泓游吳山分得開字

游人爭上最高臺。吟賞還輸我輩來。白髮登山猶卻杖。青春入手莫辭杯。夢中鼓吹元宵過。烟外江湖望眼開。爲避香塵尋曲徑。洞天寒護一林梅。

雪晴寄可堂龍泓

元冥奪春三日雪。雪晴日出寒逾嚴。爐温覆手未忍別。裘敝裹身無可添。玉立數峯在北戶。泉垂幾滴當南簷。西溪梅信行復動。野艇料理詩瓢兼。

同吳可堂河渚探梅

渚中有渚吾舊句。三年重問梅花渡。人不看花花看人。鄭老周郎已泉路。筠谷穆門皆昔看花侶也。同行詩客比水曹。情與梅花如肺附。初過石函三兩株。旋轉法華千萬樹。遠簇漁汀未銷雪。近遮山屋才開霧。香來竹外逆風聞。枝壓橋邊捨舟步。繁花亂插天作紙。疎影橫眠池是譜。縱饒畫手有湯楊。那比春工多活趣。平生萬事苦蹉跎。花趁晴看亦遭遇。微吟西日爲予遲。游蹤又逐寒蜂去。

西溪山莊重有感

長生何藥試紅爐。揀盡溪山住得無。芳草不知人事改。寒梅半逐世情枯。洗妝閣圯辭春燕。吹笛廊空有夜烏。剩取曲池堪照影。幾回閑遠更躊躇。

夜宿雲溪菴

明仁和徐繼恩字世臣崇禎壬午副榜注名復社鼎革後爲僧號偃亭菴其所瓶也。

行盡梅花曲曲溪。溪深何處辨東西。入門初見佛燈上。高枕不知林月低。逸士染衣曾給社。幽人疥壁漫留題。春來頗愛參禪味。曉起呼童斲筍泥。

雨中肩輿至永興寺看綠萼而返

籃輿軋軋傍溪隈。野寺看梅又一來。舊壁詩憎山雨敗。危樓花遣午鐘催。兩朝雙幹江南少。碧蘚青鬚竹外開。折取尙愁添口業。誇人載得綠珠回。

同紆齋龍威登寶石山麓望湖復集昭慶寺僧房分賦

輕陰無雨亦冥濛。出郭招尋一望中。橋外人歸山罨畫。柳梢船度水浮空。年光會計春將半。笑語留連跡偶同。莫忘僧坊幽事在。酌泉燒筍落梅風。

聖駕駐蹕西湖。恭紀一律。以當衢歌。

化日嬉游鬢已斑。野臣何幸仰天顏。因遵祖訓巡方舉。爲奉慈闈賜粟頒。羽衛參差依弱柳。簫韶和協繞春山。君王要與民同樂。特許三門夜不關。三門。錢塘。湧金。清波也。

邗上逢張浦山。卽送其重游大梁。兼寄桑叟甫。

秀州城下張居士。握手邗江語不休。畫裏看山殊傲兀。詩中說餅亦風流。詩以與叟甫說餅。長歌見示。馬卿謝病誰知己。杜老登臺豈壯游。若見故人相問訊。爲言憶遠雪盈頭。

六十生日答吳葦村見貽之作

我生少孤露。力學恨不早。孱軀復多病。膚理久枯槁。干進嬾無術。退耕苦難飽。悵下第溫岐。歸敝廬孟浩。風塵恥作吏。山水事幽討。結託賢友生。耽吟忘潦倒。流光去若馳。年境已至老。禮六十曰耆。賀瑒云。贈言至也。言至老境也。贈言感君意。璜琮藉文纒。生辰與我同。壯盛君自好。君如初陽升。積漸滿晴昊。我如炳燭微。餘光近衰草。榮名無足憑。里曲豈堪寶。三復誦君詩。慙汗滿懷抱。

壽樊榭先生六十

吳鳳華

先生閩史辰。五月莫吐二。余生較大晚。亦此日墮地。聞今周甲子。賀客接跡至。爲重富文辭。曾中七經醉。品格如孤松。有勁直無媚。盛世右文儒。笙典堪鼓吹。獻賦聲塵空。一發偶不遂。飄泊孝廉船。道腴豈憔悴。靈運游山詩。字字溼寒翠。可以傲神仙。何必有名位。伊余困塵縛。妄欲窺金匱。懸殊實徑庭。生朝枉相類。一笑甲辰雌。足以徵古事。惟祝享脩齡。庶得蠅附驥。

嶰谷寄鶴天寧僧舍有作同人和之

剪翎輕別閩風巔。復恐翻飛計未全。也識長身非近玩。且教仙質伴枯禪。三花樹下容聽偈。九杞山中佇

買田。孫太初養鶴南屏許相卿爲買田于九杞山有鶴田券。此段高情消得否。一聲叫破石堂烟。

爲商寶意悼亡妾環娘次韻四首

茫茫愛水正無邊。曾說佳名玉字連。解後那堪成夜恨。循來猶記困春眠。依稀朱鳥窗中事。短折霓裳曲裏年。倒瀉天河作平地。人閒終不罷相憐。筭年拜壻定無差。誰道開花早落花。今日煙波司馬淚。當年風月翰林家。鬢雲翠減傷瓊樹。臂玉香消失綠華。可惜寶甌勤禮處。不求其命作頻伽。

騎去青鸞入杳冥。檀郎從此號商星。草名懷夢真成幻。衣可招魂豈有靈。弟子尙留吹了笛。侍兒忍捧誦殘經。扁舟共汎尋常事。腸斷東風橋李亭。

從來薄命是佳人。槿豔珠漚莫認真。歸葬稽山終化土。前生瑤島本無塵。可能消領詩中意。何限低回畫裏身。官路多辛頭白早。知君不復更尋春。

挽方環山

別時君善飯。驚見素帷陳。水逝悲同甲。松摧失俊人。文章秋卷冷。粉墨夜臺新。舊贈營工筆。今逾什襲珍。
曾作臨平藕花圖及
傲雲林小景見貽

早秋同近人授衣于湘集天寧寺具公方丈同用東坡病中游祖塔院韻

漠漠空林散佛香。斷雲吹雨一天涼。客臨流水心都淨。僧自鄉山話更長。解夏有期思本寺。打包笑我倦諸方。食時五觀今參得。慙媿秋蔬此飽嘗。

集易松滋半厂書屋送蔣秋涇還樵李

同作蕪城客。離情忽不任。浮雲三塔遠。落日大江陰。主禮秋菘剪。賓筵夜燭侵。歸橈子亦近。相趁早潮深。
汪巢林八分書歌

少陵論書得其真。曾云書貴瘦硬方通神。昌黎論書有深意。苦道羲之俗書趁姿媚。由來八法壞六書。二篆微茫竟誰嗣。八分元從二篆生。強被歐陽呼隸字。漢人近古無差訛。流傳後代已不多。郭香察書久埋沒。武梁書像今銷磨。任城五碑蟲蝕蘚。泗水九刻龍騰梭。巢林居士老好事。典衣不惜窮蒐羅。手摹心追

筆成家。坐臥三日難同科。腕懸仍似蠶頭篆。筆磔稍存隼尾波。只餘瘦硬乏姿媚。每受俗眼相譏訶。興來爲我書數幅。奴視唐朝韓擇木。豪家屏障豈相宜。挂我脩脩竹閒屋。

樊榭山房續集卷第九

詞甲

梅子黃時雨

梅雨

枯坐幽窗。賺輕夢破時。驚響荷扇。正濃綠牆頭。金丸堪薦。想到一犁江上。暝愁將入。吳雲遠。淙潺徧。吹笛夜船。燈影遙顫。深院殘寒猶戀。漫妨他燕乳。簾暗慵卷。柰掃壁看題。蝸偷銀篆。依約紅綃香潤句。韞羅應竚沿階。蘇風微便。樓前鏡波深淺。

摸魚兒

和葑田病耳

甚年時。楚江寒早。病懷偏惱。孤旅悠然自喚空。閑字瘦影。幾番回顧。難寐處也。省聽敲窗暗葉穿階雨。殘更漫數。總付與醒眸。青燈素被。渾未減愁緒。人間世。幾箇知音伴侶。幽蘭淥水休譜。祇應不了枯禪味。聞性卷荷猶貯。凝思苦。問隔屋。釵聲可是忘情句。因君小住。向無想山中。飛塵浣斷。相約枕流去。

瑣窗寒

初夏同葑田松泉過深柳草堂

戶小關雲城高隄碧嫩陰搖瓦何年種柳正憶漢南游冶想依依香綿褪時繡鴛不到閑庭榭付餘花倦
螻橋痕簾影伴人情話疎野連漁汶聽笛弄滄浪悄然歌罷離蹤似寄頓冷故溪吟社笑輸他桃根渡
頭載來翠峯偏淡寫看離根艇子縈回任取浮萍惹

天香

辭鏡

藍浪浮花青銅淬彩空明大好無翳樣巧裁菱面平措粉不數尙方新製吳船載取縈繡帶疑廻鸞翅低
挂蘇潭片月如描弁峯晴翠華年誤人似此杜郎看鬢絲難避幾對淺渦梨暈笑臨秋水助業平生付
與最愛是長宜舊銘字聽罷懷中窺餘睡起

水龍吟

漳蘭

海帆吹送瓊姿一番又拆秋前信雲衣嫋嫋冰心的的高情占盡著意扶持青盜架小素甌茶嫩向風亭
水檻炎光不到寒香夢今纔準可惜幽芳易近有誰知楚天閑恨逢迎只許靈均水佩湘娥烟鬢驟荔
程遙蠻花種杏不堪重問試山空露下瑤琴獨按寫深林韻

摸魚兒

芡

趁平湖采芳艇小。荷盤初沸烟雨。釵莖靜照涼波影。不比脆絲纏露。花點注。看傾盡。斜陽幽意憑誰訴。西洲倩女。訝碧臆纔翻。青吭漸滿。脈脈水天曙。明珠剖。誰道暗投無誤。鮫人何事相妒。攜來菱市瓜塍畔。猶著宮黃深護。論斗煮。算風味。親嘗只有涪翁語。輕圓薦俎。早繫繫心期。春蔥膩雪。巧夕翦燈處。

齊天樂

絡緯

夕陽纔作去。微涼意。幽窗便聞秋紡。怨緒回風。情絲曳雨。交戛依然搖颺。離悰記往。在楓葉橫塘。豆花深巷。翠股斜敲。蕭蕭又送去年響。何人聽時較早。舊啼銀燭背。寒素無恙。染黛形輕。翻車韻急。偏隔秦樓朱幌。餘絢漫想。怕短髮難搔。助愁千丈。夜色柴門。幾聲天更爽。

桂枝香

銀魚

平橋永晝。慣柔浪寸鱗。來問春後。長是船橫鴨背。派流鶯脰。高人不見元真子。但烟波。到今依舊。葦汀花岸。千絲作網。笑伊還漏。更比似。針鋒細瘦。好分付吳娘。施樓烹就。翠釜芹芽菽乳。入甌芳溜。鷗鄉占取。

閑滋味。任年年。阻風中酒。幾分纖軟。堪人斷腸。憶鱸能否。

木蘭花慢

賦木犀香數珠

訝熏爐未燼。分秋字。染鉛丹。正露重銅盤。風搖鈿粟。暗和沈檀。珊瑚佩。瓔零亂。擣花房。聲共曉鐘閑。一串胸垂圓相。雙心臂纏清寒。窗閒待洗塵煩。斜挂處。藕絲單。認現住冰輪。前身香國。不算緣慳。更番秋期細數。勝纖痕。留印在雕闌。宛轉仍酬密願。氤氳難解連環。

慶宮春

冬夜泊舟鴛湖有憶

倦柳驚鴉。澄湖低月。墜霜初度篷罽。搖落心情。交加魂夢。水天離思難寫。賦箋詞筆。憶相見。秋娘淡雅。淒涼只在。學繡村邊。曉鐘敲罷。可能負卻西風。兩槳來時。暮雲凝乍。啼紅唾碧。衫痕猶澹。尙記那回簾下。怨人輕別。是纔識。香囊分麝。孤鴻遙去。說與教知。酒醒今夜。

換巢鸞鳳

張東園送洋雞一雙賦此報之

一訊槎風。有雙棲錦羽。攜取筠籠。菴時春嶼裏。啼處曉波東。洪桃花下幾回逢。乍呼小名。朱朱未通。瑤窗

遠想誤卻。汜人同夢。珍重誰乞種。持比汝南。噤痒神偏聳。幘染蠻砂。尾捎蜃雨。特地移窠分送。我已無心舞秋宵。負雛看啄苔階縫。憑丹青喚梅家。寫伊飛動。

清平樂

元夕悼亡姬

春衫淚浣。誰問春寒淺。依舊去年正月半。錦瑟華年未滿。重來徑曲苔荒。一屏梅影淒涼。疑在小樓前後。不知何處迷藏。

沁園春

聲

隔院飛來。巧囀如簧。初聞可憐。正金經學誦。生成柔輓。珠歌教唱。分外清圓。花下泠泠。簾中嚶嚶。小玉頻呼密意傳。吟郎句。慣臨流對月。韻更悠然。道將雙字聯翩。比相見春風一笑。嬌記饋桃幽思。呪餘茸舌。折楊離恨。噎在香咽。細語歡濃。嬌啼夢淺。時送吹蘭到耳邊。關情甚。聽鶯雛燕乳。仍是笄年。

影

賦就閑情。願逐娉婷。朝朝整隨。恰花陰行過。費他迴顧。柳絲遮住。暫爾相離。悄照春波。偷窺曉鏡。只道無雙更有伊。研丹粉。愛自描活脫。小樣崔徽。何妨坐起輕攜。怪幾度拋人欲睡時。又低鬟月底。問來不語。

凝眸燈下抱處如癡。蹴踘幽坊。秋千舊徑。看未分明。捉搦遲。重逢後。羨香肩斜倚。共曠屏幃。

水龍吟

題吳東壁大洋汎月圖

憑誰畫就滄溟。影連南極。搖空碧。茫茫何在。雲帆吹送。高秋今夕。蛇種城遙。鯁人國杳。水天無迹。正銀濤上湧。冰丸倒射。應笑岸。臨風幘。爲問乘槎此客。挹長庚。幾經淪謫。一官寄耳。乾坤奇處。肯教輕擲。身到清虛。胸吞雲夢。舊聞嫌窄。看蠻童起舞。澄輝零亂。瀉蓮花白。

清平樂

春游士女圖

膠鬢新拭。正是停針日。小扇撲餘無氣力。風裏楊花吹急。銷凝石畔兜鞵。不如假喫蒼苔。欲就濃香一夢。翩翩胡蝶飛來。

臺城路

題周雪舫運判萬夫人八分遺墨

使君高會詞人處。霜風正凋疎柳。白雪徵歌。青猿授簡。不惜連車沽酒。高情感舊。展翠閣遺函。玉臺嘉偶。錯落蛟龍。光和體格最清瘦。人閒謫來未久。悵芝田路杳。鸞馭難又。伏氏經傳。吳家韻寫。空絕才華前

後紅絲小籀。合長供鈴齋。異香熏透。夢井淒涼。一編時在手。

行香子

憶焦山舊游

落托華顛。棲泊頻年。展心胸。都付山川。名區壯觀。勝友奇緣。約弔坡公。訪綸老。謁焦仙。羅吼更傳。龍抱寒眠。記霜崖。佛閣燈懸。詩囊點檢。莫怪蕭然。但貯江風。貯江月。貯江烟。

沁園春

腕

十二樓高。隱約輕雲。全遮玉容。正簾衣半卷。斜支雪藕。香羅一握。乍斂春蔥。膚薄微揜。節圓漸露。獨倚霞顛。想像中。涼侵處。有退紅衫袖。淺護西風。欠伸在畫屏東。見背後凝酥兩欲融。更朱繩力怯。秋千齊挽。綵絲痕緊。端午深籠。對脈慵擡。傷心小搯。笑學簪花運未工。新來瘦。問那人知不。跳脫旋鬆。

聲聲慢

題停琴士女圖

簾垂有影。院靜無聲。誰家待月闌干。兩點深顰。分付次第眉山。薄妝乍脫。便低鬢。更自幽妍。心事遠。看轉將瑤軫。尚怯春寒。只有梅花知得。愛香生絃外。韻在絲前。小立徘徊。肯教流響空烟。人閒尚留粉本。不

愁他輕誤華年。凝望處。想參橫。依約未眠。

臺城路

當湖喜晤張今涪。別去以詞見寄。依韻奉酬。

柘西尙有詞人在。梅邊愛聽吳語。明鏡慵窺。青山欠買。贏得吟情如縷。高陽伴侶。約小醉圍爐。孟婆能阻。斜日歸鴉。一羣寒影向村塢。殘年猶是近旅。津亭仍解纜。離恨難譜。橫柳蓴鱸。東湖烟水。輸與漁兒漁女。心期暗許。在第六橋頭。酒旗茶鼓。一片春光。快教胸臆吐。

留宿張龍威藝舫。同話丁卯舊遊。有感。用前韻。

重來君有撓先卜。燈唇昨宵如語。問訊東湖。年時柳色。猶賸烟中殘縷。英游俊侶。歎范蠡船遙。黃公壚阻。一曲南莊。更無人過白雲塢。乾坤總成逆旅。化兒多戲劇。顛倒誰譜。風掩閑門。冰嘶老硯。絕代空吟貧女。淹留未許。早歲晚天寒。又催津鼓。別夢依依。小樓窗日吐。

沁園春

己巳除夕。偶讀楊南峯循吉詩云。買錫迎竈帝。酌水祀牀公。吳蓋同杭俗也。予老嬾無事。所須者。飽食安眠而已。因賦沁園春二闋。以當樂神之詞。

天上歸來。司命醉餘。家人合迎。訝蒙莊書幻。神原號髻。諾臯志怪。童亦名鏘。難覓黃羊。祇樹綠螳。小市簫

聲喚買錫。寒宵盡。早踞觚語好。黔突春生。瓣香脈脈通靈。訴口腹尋常累不輕。歎火需朋舉。常如僧飯。釜非嫫。那羨侯鯖。避場何人。先炊有典。一飽無求掩竹局。吾儕事。向山空歲晚。稍理遺經。

又

安穩閑房。仗爾平生。寢興載司。記窗橫窺月。情柔似水。屏遮聽雨。鬢改成絲。金盞低顏。玉存暖老。漸近橫陳。嚼蠟時。吾衰矣。但摸稜。不管。跌坐偏宜。一杯酌爾。休辭。想此夕殷勤也。合知笑放懷物外。年年夢。求官何處。日日。搯龜。早起雖慵。春來更健。睡法希夷好。護持寧須羨。設沈香八尺。花下頻移。

疎影

小玲瓏山館賦絮影

飛絲近遠。又綠陰弄日。吹過隋苑。比雪還輕。度水無痕。東風下。上低捲。成團作隊。冥濛甚。真其幻。總迷心眼。倚繡簾。誤卻吹時。明滅箇人庭院。尙憶張郎好句。正朦朧淡月。墜處初暝。漫綴征衣。點鬢休驚。欲捉兒童仍嬾。悠颺夢入離亭路。寫不盡。楚江春晚。笑雨餘。一種霑泥。付與老禪爲伴。

一剪梅

立夏後一日同人集晚清軒補作送春之會

吟鬢蕭疎。客夢輕。春盡忘情。春去關情。問春去了幾何程。鳩作雙聲。燕作雙聲。櫻筍盤筵。理舊盟。芳夜

心爭涼夜心爭綠。陰便是短長亭。歌趨春行。酒駐春行。

摸魚兒

透風透月兩明軒賦新荷

掃千紅已隨流去。綠雲南浦偷換。錢錢點點田田樣。浮動鏡心纔滿。青蓋輒想早畏。朱曦爲覆雙鴛伴。全舒尙卷。似龍女賤絨。鮫人帕束。含憶又含怨。西湖好。何處羅帶玉腕。采香休道來晚。粉紅未逐薰風嫁。扇底且藏嬌面。珠倒濺。聽驟雨聲聲譜入歌喉。嘖吟騷意。嬾任細裊冰絲。低搖翠柄。衣小那堪翦。

柳梢青

效許圭塘體

鬢點吳鹽。十年來去。苧翦征衫。千里鶯花。幾重烟水。一片雲帆。鄉園試話情忺。有黛染明湖鏡奩。佛士茶香。漁村蓴滑。好箇江南。

又

佳處曾探。量泉惠麓。踏蘚靈巖。多少吳娃。明妝倚舫。玉面乘籃。秧田竹屋蘆簾。指歸路垂虹舊譜。瑟瑟波搖。彎彎月唱。好箇江南。

又

臘尾春絨。楓霞徧綴。梅雪相兼。新綠初成。輭紅不到。水國無炎。女湖兒店程添。記茗雪。秋風挂帆。洲渚神仙。樓臺烟雨。好箇江南。

又

湖傲山酣。綠蓑白雨。紫筍黃柑。蠶戶新封。鷗鄉近署。當了頭銜。興來浪跡猶堪。訪酒社。詩朋快談。焦洞潮聲。攝山月色。好箇江南。

齊天樂

庚午夏五。將歸湖上。留別韓江吟社諸公。

平生慣向蕪城客。吳絲暗斑。雙鬢雪嶺才高。青樓句好。那比前人疎俊。吟朋勝引。愛款竹尋題。占花分韻。忽覺歸心。一燈搖夢野鷗近。湖山此時舊隱。玉壺涼萬斛。紅膩蓮暈。江雨鳴篷。林風解纜。離緒滿於潮信。流連未盡。謝送我多情。熟梅芳醞。彈指秋清。重逢期定準。

送樊榭歸西湖

馬曰琯

廉纖細雨侵衣袂。梅天最難調攝。苦筍過牆。青苔上砌。客裏光陰飄忽。懷歸念切。擬暫淪茶鑪。少留吟篔。只恐紅衣待君香散半湖月。吹簫何處濯髮。浸空明一片。消盡炎熱。喚艇邀涼。凭闌覓句。沙際白鷗凝雪。那堪閒關定。慕憶山齋。幾般縈結。莫負秋窗。滿林蟬亂咽。

又

馬曰璐

片帆約共雲陰遠。相看已縈愁緒。淡景邀詩。遙情入畫。綠暗前時來路。汀荷苑樹。有花底魚經。柳邊簫譜。水夢山魂。朗吟飛向鏡匳去。湖頭應憶舊侶。正疎篁露滴。如對幽語。病渴文園。耽佳飯顆。算是襟分幾度。離杯漫舉。待潮落江天。片時延佇。只到涼秋。剪燈同聽雨。

樊榭山房續集卷第十

詞乙 北樂府
小令附

人月圓黃鐘宮

甘露寺懷古

夕陽江上吳朝寺。曾記昔留題。火焚松徑。塵埋蓮鑊。雨洗苔碑。
樓空多景。鐘聲今古。帆影東西。花開花謝。潮生潮落。物是人非。

長安某氏廢園

行人指點城南路。往事半模糊。烏衣門巷。平泉樹石。金谷笙竽。
當時深貯。娘名御史。妾號尚書。而今但有。空池飛燕。破瓦奔狐。

叨叨令正宮

碧浪湖感舊

月圓波靜蘇灣暮。一船兩槳橫塘渡。秋燈紅袖曾偷護。曉妝青鏡初回顧。
憶殺人也麼哥。憶殺人也麼哥。重來都是傷心處。

醉太平正宮

看梅宿西溪山莊

掩篔簹野橋。護莎砌田塍。梅花雪擁閣如巢。供吾儕睡飽。溪深溪淺隨春笑。窗明窗暗疑人到。鐘初鐘絕帶詩敲。剩香吟半瓢。

東郊小隱

小人哉學圃。諸生耳傭書。門前綠柳蔭清渠。東風菜吐。游仙枕外分朝暮。牽絲棚外看來去。選官圖外論贏輸。閑中樂乎。

題村學堂圖

村夫子面孔。渴睡漢形容。周遭三五劣兒童。正拋書興濃。探雛趁蜨。受朋儕哄。參軍蒼鶴。把先生弄。甘羅項橐。笑古人聰。不樂如菜傭。

春雨

溼東風燕剪。灑芳樹秋千。埽晴娘拜惜花天。對珠簾暮捲。濛濛遮住宜春院。絲絲吹上傷春面。瀟瀟唱出送春筵。好春光去遠。

初夏園居

野荼蘼蓋瓦。水楊柳穿笆。翠畦深護小人家。看童兒戲耍。種瓜不長東陵價。賜櫻不羨長安話。澆蔬不減漢陰佳。任東風過馬。

後庭花 仙呂宮

冬日同江聲登吳山

仙山迴磴重。酒樓空翠中。霜落千門樹。風清十廟鐘。夕陽東越王何在。鴉翻江上峯。

次韻

金志章

林疎翠靄重。山園閤井中。輦道穿危磴。叢祠響午鐘。酒樓東天開圖畫。烟江千萬峯。

醉中天 仙呂宮

張龍威送醉蟹

無復爬沙樣。風味付廚娘。纖手紅椒擘繡匡。只合糟缸葬。春雨瀟瀟夜窗。背燈情況。畫眉人肯分將。事見張敞

一半兒 仙呂宮

金華寶婺觀

雲衣月面佩珊瑚。夜駕天風下古壇。響入赤松山外山。篆煙殘。一半兒浮空。一半兒散。

吳甌亭瓶花齋翦橙小集

移從夜雨記親栽。翦向西風入手纔。剖霧莫辭傾翠醅。輓金杯。一半兒詩成。一半兒改。

上虞百官江口舜廟

重瞳此地有遺苗。野廟空江玉座銷。無復百官趨早朝。話漁樵。一半兒龍工。一半兒鳥。

浮山禹廟和嶢谷

雲根不出廟庭隅。神怪當年豈盡誣。塑壁尙存山海圖。看模糊。一半兒蝸涎。一半兒雨。

吳山伍公廟

青山遙對海門斜。時見靈旗溼浪花。夜夜寒潮驚萬家。閃棲鴉。一半兒聲回。一半兒打。

鶴林寺米襄陽祠

仙花僧竹認松龕。遺像依稀海岳菴。野鼠有時鬚被銜。護伽藍。一半兒塵添。一半兒滅。

淮陰漂母祠

淮流日夜走青蘆。老屋煙煤一飯餘。亭長有妻曾媿無。漢規模。一半兒韓侯。一半兒母。

松江超果寺一覽樓寫望

潮迴黃歇浦邊春。天界秦皇道上曛。山冷陸機茸內雲。畫難分。一半兒丹青。一半兒粉。

題吳抱村閑居消夏圖

綠楊風裏掩茅茨。紅藕香中收釣絲。翠竹影邊吟小詩。日長時。一半兒橫經。一半兒史。

青歌兒仙呂宮

悼吳中歌者

花前偷回嬌盼。賞知音。舞袖弓彎。何處秋墳唱夜闌。拋卻青團扇兒。閑風流。旦。元夏雪蓑青樓集。李嬌兒。人目爲風流旦。

四塊玉南呂宮

題大滌貝鍊師房

種藥鉏分茶筌。蒼檜空堂隱。碧桃幽徑閑。尋徧一柱煙。五洞天。九鎖泉。

沈歸愚侍郎天台歸過訪

霜滿鞞。塵侵馬。白首諸公戀東華。相逢愛說天台話。躡嶠霞。飯瀾麻。吟瀑花。

閱金經南呂宮

同吳可堂游潮鳴寺

竹外青蓮座。水邊黃面僧。掃葉烹茶折腳鐘。迎罷翻金字經。蒼苔徑。看碑廊下行。

澆藥井

抱甕忘機事。栽花消俗緣。中有桐君上品傳。泉飛流當暑天。雲漿嘖。主人平地仙。

朝天子中呂宮

送樓于湘歸吳門

稻齊鱸肥。久憶吳中味。乘秋帆影去如飛。嫋嫋菱歌起。鶴市誰依。鴻廡單棲。算歸時仍客裏。得歸且歸。吟不了。烟波意。

同作

馬曰璐

擬行未行。猛賦得歸期定。木犀香裏晚雲晴。盼殺臯橋影。秋五湖清。月二分明。寫相思兩地情。酒城鴨。城莫忘了。盟鷗等。

紅橋納涼

藕湖柳渠。亭館風多處。十年隋苑舊詩逋。團扇招涼句。茉莉鬢酥。薔薇衣露。隔船窗聞笑語。不須醉扶。月上紅橋去。

春煙

遠林翠侵。煨爐迷離甚。夜來輕抹畫廊深。和月梨花浸。裹上羅襟。飛上瑤簪。似幽期一縷心。再尋至今。春有禁。情難禁。

滿庭芳 中呂宮

殘秋湖上有懷月田筇谷穆門三君之歿

湖山宴娛。景留年去。社散人徂。畫橋煙艇。風蒲路極。目愁予。夢已隔黃公酒壚。寫難窮。白傅詩圖。秋光暮。碧雲紅樹。泉下得知無。

題王茨簷北郭移居圖二曲

生涯自遣。嫌居市井。喜近田園。酸寒東野。唯詩卷。家具蕭然。鈍榜上。高題狀元。醉鄉中。舊署神仙。尋君便。林鶯乍囀。卽此賀新遷。
鄰家大有。東屯雞柵。北郭漁舟。鑑中煮字。今能句。飽矣何求。羊角埂。看花慢走。兔兒泉。裹茗閑游。歸來候。遙山滿眸。紫翠一筇收。

辛未重午嶰谷半查招集行菴分韻

籬閑六枳。階苔更掃。徑竹新葦。觴蒲有客。過三四。荆楚佳時。王播去。功名似此。孟嘗生。富貴何之。開胸次。須行樂耳。不用讀騷辭。

紅繡鞵 中呂宮

正月十六日。同江聲。可堂。龍泓。游吳山。分得開字。

三五夜將錢更買第一樓。有酒初開。士女燒香墜金釵。春潮和月上。暮靄送詩來。燈街人似海。

春晚

情黯黯。花前側帽路茫茫。月底吹簫。花月江南憶新妖。詩匳吟芍藥。夢枕墜櫻桃。人隨春共老。

普天樂中呂宮

題行菴爲馬嶰谷半槎兩君觴詠地。在揚州北郭。天寧寺西。

碧蘿垣。蒼筤徑。簷花月明。庭樹秋聲。碁分謝墅幽。榻下蕭齋靜。大小山名堪移贈。卜行窩。招友經行。行廚醉醒。行衣露冷。行篋詩清。

春水

雪初消。波微溜。鵝肫蕩口。鶯脰湖頭。藍拖打槳人。綠染滿幫候。何事干卿吹頻皺。笑東風。直恁風流。情如此柔。殘紅漾久。還妝樓。

喜春來中呂宮

春柳

初過元夜新黃蘸。剛近清明嫩綠攏。小紅樓外拂毵毵。黏畫衫。飛絮滿江南。

山坡羊中呂宮

秋雨初霽。嶰谷半槎。招同人集看山樓。填此曲。予以病不赴。
瓷青天逗。綃紅霞漏。井梧缺處山新瘦。雨初收。酒新篘。鯉風試弄。凭闌袖。自笑文園多病後。秋嬾上樓。愁還獨謳。

春日郊行

春山如笑。春流堪照。桃花紅出疎籬靠。醉村醪。聽神簫。社公雨灑潮王廟。雲影弄晴歸尚早。橋魚散苗。郊燕定巢。

梧葉兒商調

春山

窗中岫。天外峯。雪淨遠連空。淡冶河陽重。浮嵐北苑工。暖翠井西同。遙念著。眉梢更濃。

小桃紅越調

橫波夫人畫蘭扇敬身索賦

秦淮不見翠雙顰。摺扇香痕潤。往事眉樓有誰問。墨花春。靈均舊怨都銷盡。南朝豔粉。才人風韻。題詠到湘帚。
襲宗伯有題畫蘭帚子如夢令爲橫波作也

吳江道中

一篷風色一橈雲。詩有江湖分。第四泉邊綠陰襯。夏寒新。憑誰寄箇松陵信。楊花溷褪。楝花飛近。金鴨煖梅魂。

柳營曲越調

尋秦淮舊院遺址

支瘦筇。訪城東。板橋夕陽依舊紅。名士詞工。狎客歌終。醉臥錦臙叢。閑愁埋向其中。溫柔老卻吳儂。香銷南國盡。花落後庭空。風吹夢去無蹤。

春夜汎湖

停漏籤。展冰匳。春湖可人花月兼。蜨夢厭厭。柳影纖纖。山隔夜明簾。呼燈重問青帘。叩舷同唱烏鹽。泝流光。三塔動。衝香霧。六橋黏。尖風起。索衣添。

漁家

漁事多。柰漁何。漁心太平誰似我。春雨漁蓑。落日漁艇。漁舍水雲窩。約漁兄。漁弟經過。聚漁兒。漁女婆娑。漁竿連月浸。漁網帶烟拖。歌漁笛。定風波。

漫作效康洪東體

回敵車。守空廬。貧中自憐貧有餘。烏識親疎。花驗榮枯。笑讀古人書。扁舟不逐陶朱。布衣空羨丹徒。英雄

重俯仰。事業一欵歔。初只合老樵漁。

春思效張小山體

紅漸稀。綠初肥。暖風一團香絮飛。春入長眉。春著單衣。無處問相宜。乍開簾。芳草東西。倦凭闌。粉蝶高低。鳥聽秦吉了。花發蜀當歸。伊誤了。牡丹期。

沈醉東風雙調

春日西湖

謁東閣。平生未肯典西湖。此事休云。約酒朋探芳信。賣錫天。柳嬌花嫩。老作承平快活人。看鏡裏春山似。晒。元劉致中醉中天自注云。宋諺有典賣西湖之語。臺諫謂之賣了西湖。既賣則不可復省院謂之典了西湖。猶可贖也。無官守。無言責。此古人所以輕視軒冕歟。

紅橋水亭看荷

移舫子。雲陰半掩。倒闌干。魚影深潛。池分九曲涼。花比重湖豔。看娉婷。不隔湘簾。疎雨催詩意未忺。但葉上聲來數點。

折桂令雙調

金陵朝天宮秋寓

笑平生。詩卷生涯。偶寄雲房。似到仙家。鏡照山精。鐘敲夜斗。鼎鍊秋霞。申地園。不留破瓦。卞公墳。誰種殘

花莫羨豪華。六代興亡。衰柳啼鴉。

賦得客帳夢封侯

傍幽窗。斗帳淒涼。何許儒冠。忽擁油幢。虎士趨風。蛾眉環坐。珠履成行。班祭酒。須輕故鄉。李將軍。得遇高皇。萬里名揚。萬戶勳償。一枕邯鄲。總是荒唐。

題殿畫乞巧圖

剩前朝。一櫝丹青。長信昭陽。無限秋情。金合藏蛛。綵橋度鵲。紈扇飛螢。聽玉漏。遲遲五更。拜銀灣。脈脈雙星。梧影闌庭。不卜他生。但祝今生。

低髻

理香絲。樣減菱銅。緊縮螺尖。不放鴉鬆。翠葉斜安。金釵短插。羅帕輕籠。行雲穩。微微楚峯。墮花慳。小小吳宮。傳徧城中。壓倒韋娘。見慣司空。

述懷

問先生。底事窮愁。放浪形骸。笑傲王侯。不隱終南。不官彭澤。不訪丹丘。搔白髮。三千丈在手。算明年。六十歲平頭。天許奇游。弄月蛟門。看雨龍湫。

西湖次趙文寶韻

比西湖西子爭誇。西子看來，尙遜穠華。不盡雲山，無窮煙柳，可惜風花。斜陽在，黃妃舊塔，醉鄉眠。蘇小誰家。流水殘霞。新月如牙。油壁香車，歸去吳娃。

浩然巾

展鮫綃。一幅裁雲。素頸遮寒。翠鬢藏春。踏雪風流，尋梅窈窕，照鏡溫存。分明是，江妃後塵。又猜疑，孟浩前身。詩客知恩。剛近香肩。凍粟無痕。

題徐安生桂花湖石小幅爲丁龍泓作

是何人，染出秋光。石擬聞荃，樹訝懸香。纖手皺苔，柔毫暈碧，嬌額分黃。權當作，如來供養。也應教，才子收藏。腸斷吳閩。漂泊多情。老去徐娘。

懷嶰谷游金陵效疊韻體

溯空行。小艇風輕。萬頃潮平。清興堪乘。山迴雲生。林青雨映。一轡金陵景。陽井苔崩舊京。石頭城煙冷。新亭茶鼎禪燈。竹徑江聲。酒聖詩盟。少摒塵纓。緩定歸程。

楊妃病齒延清齋分賦

宴華清。何限歡娛。底事朝來。粉悴香墮。柳葉微顰。瓠犀小冷。棠萼愁吁。沒亂煞，開天帝主。敕離支，休進中廚。塞上思酥。突騎長驅。活玉巢中。且忍須臾。

清江引雙調

蘇堤春曉

誰家總宜船。玩景落月長隄。柳煙舒翠屏。花露揩明鏡。西施帳中春夢醒。

花港觀魚

東風倚闌花似雪。小汐分鱗鬣。魚將花吐吞。花逐魚明滅。人生不如魚樂也。

柳浪聞鶯

小鶯擲梭風柳靡。翠線波痕細。雙柑酒便攜。兩豆塵休閉。百單八聲春去矣。

麴院風荷

風漪四圍深院宇。荷氣銷炎處。斜明柳外虹。亂颭萍閒鷺。來看翠盤高下舞。

兩峯插雲

南北兩高青對聳。氣溼雲飛動。牛頭縹渺齊。馬耳冥濛共。僧歸雨來龍颺湧。

平湖秋月

月明滿湖剛著我。不攪魚龍臥。碧瀾寸寸秋。桂子紛紛墮。星河醉驚都繞舸。

三潭印月

魚王國中看月上。三塔遙相望。浮珠白一丸。沈璧寒千丈。夜深老禪心一樣。
雷峯夕照

黃妃塔頽如醉叟。大好殘陽逗。渾疑劫燒餘。忽訝飛光候。漁村網收人喚酒。
南屏晚鐘

鯨鑿一聲山鳥駭。響徹青松外。雲遮五百閒。月上三千界。歸舟幾聽頭漸白。
斷橋殘雪

水南數峯皴粉少。玉竦澄餘照。鷗邊草欲蘇。驢背梅初笑。林逋宅荒猶未掃。
榮貴戲作

晚菘一筐堪適口。莫笑貧家陋。求添轉不能。問價高於舊。宜州老人空肚久。
落梅風雙調

華秋岳爲予寫西溪卜居圖因題其上

橫斜影。清淺溪。翠濛濛。嫩寒山氣。梅花見招深處棲。草堂資。故人誰寄。

孤山訪梅

蜂鬚采。鶴膝枝。背湖陰。杳無人至。逋仙墓前春若此。瘦吟肩。聳成山字。

歲除得沈椒園山東書

琴工欠藥券遲。逼殘年有臺難避。門前雁行誰解圍。沈三兄。俸錢遙寄。張說謂沈佺期曰。沈三兄詩。須還他第一。椒園行三。故云。

鄰牆杏花

高樓雨深巷。風惜花人作詩無用。紅香笑窺牆角東。笑先生白頭非宋。

嶰谷送漳蘭

心占易佩擬騷。兩三莖送秋先到。吐幽香暗將炎晝消。雪窗僧寫來難肖。

原作

馬曰琯

清風灑涼露滋。瘦亭亭自憐幽致。伴同心玉琴調七絲。小窗中略添秋思。

水仙子雙調

虎邱書所見

王珣宅畔曉鐘催。朱耐花邊午店開。仇英畫裏春妝賽。趁清明冷食來。施山僧那惜金釵。低潤臉男兒拜。整新羣侍婢。擡恨無端。落日船回。

竹下水仙

翠雲影掠玉鈿柔。蒼雪聲搖金瓊流。天寒正倚佳人袖。是何年雅蒜收。傍琅玕。鵝管花抽。墨胎子。生來瘦。

楚湘娥分外愁。合就清幽。

齊瓊臺侍郎雪中過訪

十年握手意偏深。千里言懷喜不禁。三公折臂君尤甚。臥天台琪樹陰。惹蒼生。望到而今。剡雪淒清興。江雲縹緲心。有約聯吟。

謝馬嶰谷半棧惠人蓑

靈苗合在阮生家。香藥應須溫尉誇。連根便是邊鸞畫。價兼金難賚他。起沈疴。何必丹砂。秋寄逢江雨。晨煎汲井花。此意無涯。

殿前歡雙調

秋思用張小山春思韻

寫秋思。芭蕉葉葉竹枝枝。南湖風雨涼何自。潘鬢成絲。蟲聲唱鬼詩。雁影排人字。鳳紙書仙事。餘香滅後。幽夢回時。

春草

燒痕春無端喚起踏青人。青青有盡愁無盡。不入侯門。濃將落日薰。媚借飛花襯。色作羅裙認。小卿墓上。西子湖濱。

撥不斷雙調

晚秋田家

倚霜根望前村。西風漸掠歸鴉陣。稻熟租分斛面勻。菊香醉枕鉏頭穩。是非休問。

枳郎兒雙調

月夜過吳梅查青棠館

趁微涼。訪書堂。淡月正昏黃。卍字闌干亞字牆。新詞同唱合歡。花影轉東廊。

